

# 楚辞

【战国】屈原



## 版权信息

---

书名：【战国】楚辞

作者：屈原

中信出版集团制作发行

版权所有·侵权必究

## 楚辞 离骚

---

帝高阳之苗裔兮，朕皇考曰伯庸。  
摄提贞于孟陬兮，惟庚寅吾以降。  
皇览揆余初度兮，肇锡余以嘉名：  
名余曰正则兮，字余曰灵均。  
纷吾既有此内美兮，又重之以修能。  
扈江离与辟芷兮，纫秋兰以为佩。  
汨余若将不及兮，恐年岁之不吾与。  
朝搴阰之木兰兮，夕揽洲之宿莽。  
日月忽其不淹兮，春与秋其代序。  
惟草木之零落兮，恐美人之迟暮。  
不抚壮而弃秽兮，何不改乎此度？  
乘骐骥以驰骋兮，来吾道夫先路！  
昔三后之纯粹兮，固众芳之所在。  
杂申椒与菌桂兮，岂维纫夫蕙茝！  
彼尧、舜之耿介兮，既遵道而得路。  
何桀、纣之昌披兮，夫唯捷径以窘步。  
惟党人之偷乐兮，路幽昧以险隘。

岂余身之僇殃兮，恐皇舆之败绩！  
忽奔走以先后兮，及前王之踵武。  
荃不揆余之中情兮，反信谗以齎怒。  
余固知謇謇之为患兮，忍而不能舍也。  
指九天以为正兮，夫唯灵修之故也。  
曰黄昏以为期兮，羌中道而改路！  
初既与余成言兮，后悔遁而有他。  
余既不难夫离别兮，伤灵修之数化。  
余既滋兰之九畹兮，又树蕙之百亩。  
畦留夷与揭车兮，杂杜衡与芳芷。  
冀枝叶之峻茂兮，原俟时乎吾将刈。  
虽萎绝其亦何伤兮，哀众芳之芜秽。  
众皆竞进以贪婪兮，凭不厌乎求索。  
羌内恕己以量人兮，各兴心而嫉妒。  
忽驰骛以追逐兮，非余心之所急。  
老冉冉其将至兮，恐修名之不立。  
朝饮木兰之坠露兮，夕餐秋菊之落英。  
苟余情其信姱以练要兮，长顗颔亦何伤。  
擥木根以结茝兮，贯薜荔之落蕊。  
矫菌桂以纫蕙兮，索胡绳之纚々。

謇吾法夫前修兮，非世俗之所服。  
虽不周於今之人兮，愿依彭咸之遗则。  
长太息以掩涕兮，哀民生之多艰。  
余虽好修姱以鞿羈兮，謇朝諝而夕替。  
既替余以蕙纁兮，又申之以揽茝。  
亦余心之所善兮，虽九死其犹未悔。  
怨灵修之浩荡兮，终不察夫民心。  
众女嫉余之蛾眉兮，谣诼谓余以善淫。  
固时俗之工巧兮，偃规矩而改错。  
背绳墨以追曲兮，竞周容以为度。  
饨郁邑余佗傺兮，吾独穷困乎此时也。  
宁溘死以流亡兮，余不忍为此态也。  
鸷鸟之不群兮，自前世而固然。  
何方圜之能周兮，夫孰异道而相安？  
屈心而抑志兮，忍尤而攘诟。  
伏清白以死直兮，固前圣之所厚。  
悔相道之不察兮，延伫乎吾将反。  
回朕车以复路兮，及行迷之未远。  
步余马於兰皋兮，驰椒丘且焉止息。  
进不入以离尤兮，退将复修吾初服。

制芰荷以为衣兮，集芙蓉以为裳。  
不吾知其亦已兮，苟余情其信芳。  
高余冠之岌岌兮，长余佩之陆离。  
芳与泽其杂糅兮，唯昭质其犹未亏。  
忽反顾以游目兮，将往观乎四荒。  
佩缤纷其繁饰兮，芳菲菲其弥章。  
民生各有所乐兮，余独好修以为常。  
虽体解吾犹未变兮，岂余心之可惩。  
女嬃之婵媛兮，申申其詈予，曰：  
“鲧婞直以亡身兮，终然殀乎羽之野。  
汝何博謇而好修兮，纷独有此姱节？  
蕲茝蓀以盈室兮，判独离而不服。”  
众不可户说兮，孰云察余之中情？  
世并举而好朋兮，夫何茆独而不予听？  
依前圣以节中兮，喟凭心而历兹。  
济沅、湘以南征兮，就重华而陈词：  
启《九辨》与《九歌》兮，夏康娱以自纵。  
不顾难以图后兮，五子用失乎家巷。  
羿淫游以佚畋兮，又好射夫封狐。  
固乱流其鲜终兮，浞又贪夫厥家。

浇身被服强圉兮，纵欲而不忍。

日康娱而自忘兮，厥首用夫颠隕。

夏桀之常违兮，乃遂焉而逢殃。

后辛之菹醢兮，殷宗用而不长。

汤、禹俨而祗敬兮，周论道而莫差。

举贤才而授能兮，循绳墨而不颇。

皇天无私阿兮，览民德焉错辅。

夫维圣哲以茂行兮，苟得用此下土。

瞻前而顾后兮，相观民之计极。

夫孰非义而可用兮？孰非善而可服？

阽余身而危死兮，览余初其犹未悔。

不量凿而正枘兮，固前修以菹醢。

曾歔歔余郁邑兮，哀朕时之不当。

揽茹蕙以掩涕兮，霑余襟之浪浪。

跪敷衽以陈辞兮，耿吾既得此中正。

驰玉虬以乘鹭兮，溘埃风余上征。

朝发轫於苍梧兮，夕余至乎县圃。

欲少留此灵琐兮，日忽忽其将暮。

吾令羲和弭节兮，望崦嵫而勿迫。

路曼曼其修远兮，吾将上下而求索。

饮余马於咸池兮，总余轡乎扶桑。  
折若木以拂日兮，聊逍遥以相羊。  
前望舒使先驱兮，后飞廉使奔属。  
鸾皇为余先戒兮，雷师告余以未具。  
吾令凤鸟飞腾兮，继之以日夜。  
飘风屯其相离兮，帅云霓而来御。  
纷总总其离合兮，斑陆离其上下。  
吾令帝阍开关兮，倚闾阖而望予。  
时暧暧其将罢兮，结幽兰而延伫。  
世溷浊而不分兮，好蔽美而嫉妒。  
朝吾将济於白水兮，登阊风而縹马。  
忽反顾以流涕兮，哀高丘之无女。  
溘吾游此春宫兮，折琼枝以继佩。  
及荣华之未落兮，相下女之可诒。  
吾令丰隆乘云兮，求宓妃之所在。  
解佩纕以结言兮，吾令蹇修以为理。  
纷总总其离合兮，忽纬繣其难迁。  
夕归次於穷石兮，朝濯发乎洧盘。  
保厥美以骄傲兮，日康娱以淫游。  
虽信美而无礼兮，来违弃而改求。



览相观於四极兮，周流乎天余乃下。

望瑶台之偃蹇兮，见有娥之佚女。

吾令鸩为媒兮，鸩告余以不好。

雄鸩之鸣逝兮，余犹恶其佻巧。

心犹豫而狐疑兮，欲自適而不可。

凤皇既受诒兮，恐高辛之先我。

欲远集而无所止兮，聊浮游以逍遥。

及少康之未家兮，留有虞之二姚。

理弱而媒拙兮，恐导言之不固。

世溷浊而嫉贤兮，好蔽美而称恶。

闺中既以邃远兮，哲王又不寤。

怀朕情而不发兮，余焉能忍而与此终古？

索琼茅以筮簪兮，命灵氛为余占之。

曰：“两美其必合兮，孰信修而慕之？

思九州之博大兮，岂惟是其有女？”

曰：“勉远逝而无狐疑兮，孰求美而释女？

何所独无芳草兮，尔何怀乎故宇？”

世幽昧以眩曜兮，孰云察余之善恶？

民好恶其不同兮，惟此党人其独异！

户服艾以盈要兮，谓幽兰其不可佩。

览察草木其犹未得兮，岂琤美之能当？

苏粪壤以充帟兮，谓申椒其不芳。

欲从灵氛之吉占兮，心犹豫而狐疑。

巫咸将夕降兮，怀椒糈而要之。

百神翳其备降兮，九疑缤其并迎。

皇剡剡其扬灵兮，告余以吉故。

曰：“勉升降以上下兮，求矩矱之所同。

汤、禹俨而求合兮，挚、咎繇而能调。

苟中情其好修兮，又何必用夫行媒？

说操筑於傅岩兮，武丁用而不疑。

吕望之鼓刀兮，遭周文而得举。

甯戚之讴歌兮，齐桓闻以该辅。

及年岁之未晏兮，时亦犹其未央。

恐鹈鴂之先鸣兮，使夫百草为之不芳。”

何琼佩之偃蹇兮，众薋然而蔽之。

惟此党人之不谅兮，恐嫉妒而折之。

时缤纷其变易兮，又何可以淹留？

兰芷变而不芳兮，荃蕙化而为茅。

何昔日之芳草兮，今直为此萧艾也？

岂其有他故兮，莫好修之害也！

余以兰为可恃兮，羌无实而容长。  
委厥美以从俗兮，苟得列乎众芳。  
椒专佞以慢慝兮，椒又欲充夫佩帙。  
既干进而务入兮，又何芳之能祗？  
固时俗之流从兮，又孰能无变化？  
览椒兰其若兹兮，又况揭车与江离？  
惟兹佩之可贵兮，委厥美而历兹。  
芳菲菲而难亏兮，芬至今犹未沫。  
和调度以自娱兮，聊浮游而求女。  
及余饰之方壮兮，周流观乎上下。  
灵氛既告余以吉占兮，历吉日乎吾将行。  
折琼枝以为羞兮，精琼糜以为粢。  
为余驾飞龙兮，杂瑶象以为车。  
何离心之可同兮？吾将远逝以自疏。  
邅吾道夫昆仑兮，路修远以周流。  
扬云霓之晻蔼兮，鸣玉鸾之啾啾。  
朝发轫於天津兮，夕余至乎西极。  
凤皇翼其承旂兮，高翱翔之翼翼。  
忽吾行此流沙兮，遵赤水而容与。  
麾蛟龙使梁津兮，诏西皇使涉予。

路修远以多艰兮，腾众车使径待。

路不周以左转兮，指西海以为期。

屯余车其千乘兮，齐玉轭而并驰。

驾八龙之婉婉兮，载云旗之委蛇。

抑志而弭节兮，神高驰之邈邈。

奏《九歌》而舞《韶》兮，聊假日以媮乐。

陟升皇之赫戏兮，忽临睨夫旧乡。

仆夫悲余马怀兮，蜷局顾而不行。

乱曰：已矣哉！国无人莫我知兮，又何怀乎故都！

既莫足与为美政兮，吾将从彭咸之所居！

## 九歌 东皇太一

---

吉日兮辰良，穆将愉兮上皇。

抚长剑兮玉珥，璆锵鸣兮琳琅。

瑶席兮玉瑱，盍将把兮琼芳。

蕙肴蒸兮兰藉，奠桂酒兮椒浆。

扬枹兮拊鼓，疏缓节兮安歌，陈竽瑟兮浩倡。

灵偃蹇兮姣服，芳菲菲兮满堂。

五音纷兮繁会，君欣欣兮乐康。

## 九歌 云中君

---

浴兰汤兮沐芳，华采衣兮若英。

灵连蜷兮既留，烂昭昭兮未央。

謇将憺兮寿宫，与日月兮齐光。

龙驾兮帝服，聊翱游兮周章。

灵皇皇兮既降，焱远举兮云中。

览冀州兮有馀，横四海兮焉穷。

思夫君兮太息，极劳心兮忡忡。



## 九歌 湘君

---

君不行兮夷犹，蹇谁留兮中洲？

美要眇兮宜修，沛吾乘兮桂舟。

令沅、湘兮无波，使江水兮安流。

望夫君兮未来，吹参差兮谁思？

驾飞龙兮北征，邅吾道兮洞庭。

薜荔柏兮蕙绸，荪桡兮兰旌。

望涔阳兮极浦，横大江兮扬灵。

扬灵兮未极，女婵媛兮为余太息！

横流涕兮潺湲，隐思君兮陲侧。

桂棹兮兰枻，斫冰兮积雪。

采薜荔兮水中，搴芙蓉兮木末。

心不同兮媒劳，恩不甚兮轻绝。

石濂兮浅浅，飞龙兮翩翩。

交不忠兮怨长，期不信兮告余以不閒。

朝骋骛兮江皋，夕弭节兮北渚。

鸟次兮屋上，水周兮堂下。

捐余玦兮江中，遗余佩兮澧浦。

采芳洲兮杜若，将以遗兮下女。

时不可兮再得，聊逍遥兮容与。

## 九歌 湘夫人

---

帝子降兮北渚，目眇眇兮愁予。  
袅袅兮秋风，洞庭波兮木叶下。  
登白蘋兮骋望，与佳期兮夕张。  
鸟何萃兮蘋中？罾何为兮木上？  
沅有芷兮澧有兰，思公子兮未敢言。  
荒忽兮远望，观流水兮潺湲。  
麋何食兮庭中？蛟何为兮水裔？  
朝驰余马兮江皋，夕济兮西澨。  
闻佳人兮召予，将腾驾兮偕逝。  
筑室兮水中，葺之兮荷盖。  
荪壁兮紫坛，𦏧芳椒兮成堂。  
桂栋兮兰橈，辛夷楣兮药房。  
罔薜荔兮为帷，薜蘅櫜兮既张。  
白玉兮为镇，疏石兰兮为芳。  
芷葺兮荷屋，缭之兮杜衡。  
合百草兮实庭，建芳馨兮庑门。  
九嶷缤兮并迎，灵之来兮如云。

捐余袂兮江中，遗余裸兮澧浦。

搴汀洲兮杜若，将以遗兮远者。

时不可兮骤得，聊逍遥兮容与。

## 九歌 大司命

---

广开兮天门，纷吾乘兮玄云。

令飘风兮先驱，使涷雨兮洒尘。

君回翔兮以下，逾空桑兮从女。

纷总总兮九州，何寿夭兮在予！

高飞兮安翔，乘清气兮御阴阳。

吾与君兮齐速，导帝之兮九坑。

灵衣兮被被，玉佩兮陆离。

壹阴兮壹阳，众莫知兮余所为。

折疏麻兮瑶华，将以遗兮离居。

老冉冉兮既极，不浸近兮愈疏。

乘龙兮辚辚，高驰兮冲天。

结桂枝兮延伫，羌愈思兮愁人。

愁人兮奈何！原若今兮无亏。

固人命兮有当，孰离合兮可为？

## 九歌 少司命

---

秋兰兮麝芜，罗生兮堂下。

绿叶兮素枝，芳菲菲兮袭予。

夫人自有兮美子，荪何以兮愁苦？

秋兰兮青青，绿叶兮紫茎。

满堂兮美人，忽独与余兮目成。

入不言兮出不辞，乘回风兮载云旗。

悲莫悲兮生别离，乐莫乐兮新相知。

荷衣兮蕙带，儵而来兮忽而逝。

夕宿兮帝郊，君谁须兮云之际？

与女游兮九河，冲风至兮水扬波。

与女沐兮咸池，晞女发兮阳之阿。

望美人兮未来，临风恍兮浩歌。

孔盖兮翠旌，登九天兮抚彗星。

怱长剑兮拥幼艾，荪独宜兮为民正。



## 九歌 东君

---

暾将出兮东方，照吾槛兮扶桑。

抚余马兮安驱，夜皎皎兮既明。

驾龙辀兮乘雷，载云旗兮委蛇。

长太息兮将上，心低徊兮顾怀。

羌声色兮娱人，观者憺兮忘归。

絃瑟兮交鼓，箫锺兮瑶虞。

鸣篪兮吹竽，思灵保兮贤姱。

翱飞兮翠曾，展诗兮会舞。

应律兮合节，灵之来兮蔽日。

青云衣兮白霓裳，举长矢兮射天狼。

操余弧兮反沦降，援北斗兮酌桂浆。

撰余辔兮高驰翔，杳冥冥兮以东行。

## 九歌 河伯

---

与女游兮九河，冲风起兮横波。

乘水车兮荷盖，驾两龙兮骖螭。

登昆仑兮四望，心飞扬兮浩荡。

日将暮兮怅忘归，惟极浦兮寤怀。

鱼鳞屋兮龙堂，紫贝阙兮朱宫。

灵何为兮水中？乘白鼋兮逐文鱼，

与女游兮河之渚，流澌纷兮将来下。

子交手兮东行，送美人兮南浦。

波滔滔兮来迎，鱼邻邻兮媵予。

## 九歌 山鬼

---

若有人兮山之阿，被薜荔兮带女萝。  
既含睇兮又宜笑，子慕予兮善窈窕。  
乘赤豹兮从文狸，辛夷车兮结桂旗。  
被石兰兮带杜衡，折芳馨兮遗所思。  
余处幽篁兮终不见天，路险难兮独后来。  
表独立兮山之上，云容容兮而在下。  
杳冥冥兮羌昼晦，东风飘兮神灵雨。  
留灵修兮憺忘归，岁既晏兮孰华予？  
采三秀兮於山间，石磊磊兮葛蔓蔓。  
怨公子兮怅忘归，君思我兮不得閒。  
山中人兮芳杜若，饮石泉兮荫松柏。  
君思我兮然疑作。  
雷填填兮雨冥冥，猿啾啾兮又夜鸣。  
风飒飒兮木萧萧，思公子兮徒离忧。

## 九歌 国殇

---

操吴戈兮披犀甲，车错毂兮短兵接。

旌蔽日兮敌若云，矢交坠兮土争先。

凌余阵兮躐余行，左骖殪兮右刃伤。

霾两轮兮絏四马，援玉枹兮击鸣鼓。

天时{封心}兮威灵怒，严杀尽兮弃原野。

出不入兮往不反，平原忽兮路超远。

带长剑兮挟秦弓，首身离兮心不惩。

诚既勇兮又以武，终刚强兮不可凌。

身既死兮神以灵，魂魄毅兮为鬼雄。

## 九歌 礼魂

---

成礼兮会鼓，传芭兮代舞。

姱女倡兮容与。

春兰兮秋菊，长无绝兮终古。

天问

曰：

遂古之初，谁传道之？

上下未形，何由考之？

冥昭瞢闇，谁能极之？

冯翼惟像，何以识之？

明明闇闇，惟时何为？

阴阳三合，何本何化？

圜则九重，孰营度之？

惟兹何功，孰初作之？

斡维焉系，天极焉加？

八柱何当，东南何亏？

九天之际，安放安属？

隅隈多有，谁知其数？

天何所沓？十二焉分？

日月安属？列星安陈？

出自汤谷，次于蒙汜。

自明及晦，所行几里？

夜光何德，死则又育？

厥利维何，而顾菟在腹？

女歧无合，夫焉取九子？

伯强何处？惠气安在？

何阖而晦？何开而明？

角宿未旦，曜灵安藏？

不任汨鸿，师何以尚之？

玆曰“何忧”，何不课而行之？

鸱龟曳衔，鲧何听焉？

顺欲成功，帝何刑焉？

永遏在羽山，夫何三年不施？

伯禹愎鯀，夫何以变化？

纂就前绪，遂成考功。

何续初继业，而厥谋不同？

洪泉极深，何以寘之？

地方九则，何以坟之？



河海应龙？何尽何历？

鯀何所营？禹何所成？

康回冯怒，墜何故以东南倾？

九州安错？川谷何洿？

东流不溢，孰知其故？

东西南北，其修孰多？

南北顺臑，其衍几何？

昆仑县圃，其居安在？

增城九重，其高几里？

四方之门，其谁从焉？

西北辟启，何气通焉？

日安不到？烛龙何照？

羲和之未扬，若华何光？

何所冬暖？何所夏寒？

焉有石林？何兽能言？

焉有虬龙、负熊以游？

雄虺九首，儵忽焉在？

何所不死？长人何守？

靡萍九衢，泉华安居？

灵蛇吞象，厥大何如？

黑水、玄趾，三危安在？

延年不死，寿何所止？

鲧鱼何所？魍堆焉处？

羿焉殢日？乌焉解羽？

禹之力献功，降省下土四方。

焉得彼姁山女，而通之於台桑？

閼妃匹合，厥身是继。

胡为嗜不同味，而快朝饱？

启代益作后，卒然离繫。

何启惟忧，而能拘是达？

皆归射鞠，而无害厥躬。

何后益作革，而禹播降？

启棘宾商，《九辨》、《九歌》。

何勤子屠母，而死分竟地？

帝降夷羿，革孽夏民。

胡射夫河伯，而妻彼雒嫫？

冯珧利决，封豨是射。

何献蒸肉之膏，而后帝不若？

浞娶纯狐，眩妻爰谋。

何羿之射革，而交吞揆之？

阻穷西征，岩何越焉？

化为黄熊，巫何活焉？

咸播秬黍，莆藿是营。

何由并投，而鲧疾修盈？

白蜺婴茀，胡为此堂？

安得夫良药，不能固臧？

天式从横，阳离爰死。

大鸟何鸣，夫焉丧厥体？

蓱号起雨，何以兴之？

撰体胁鹿，何以膺之？

鳌戴山抃，何以安之？

释舟陵行，何之迁之？

惟浇在户，何求于嫂？

何少康逐犬，而颠陨厥首？

女歧缝裳，而馆同爰止。

何颠易厥首，而亲以逢殆？

汤谋易旅，何以厚之？

覆舟斟寻，何道取之？

桀伐蒙山，何所得焉？

妹嬉何肆，汤何殛焉？

舜闵在家，父何以<鱼豢>？

尧不姚告，二女何亲？

厥萌在初，何所意焉？

璜台十成，谁所极焉？

登立为帝，孰道尚之？

女娲有体，孰制匠之？

舜服厥弟，终然为害。

何肆犬豕，而厥身不危败？

吴获迄古，南岳是止。

孰期去斯，得两男子？

缘鹄饰玉，后帝是飧。

何承谋夏桀，终以灭丧？

帝乃降观，下逢伊挚。

何条放致罚，而黎服大说？

简狄在台啻何宜？玄鸟致贻女何喜？

该秉季德，厥父是臧。

胡终弊于有扈，牧夫牛羊？

干协时舞，何以怀之？

平胁曼肤，何以肥之？

有扈牧豎，云何而逢？

击床先出，其命何从？

恒秉季德，焉得夫朴牛？

何往营班禄，不但还来？

昏微遵迹，有狄不宁。

何繁鸟萃棘，负子肆情？

眩弟并淫，危害厥兄。

何变化以作诈，而后嗣逢长？

成汤东巡，有莘爰极。

何乞彼小臣，而吉妃是得？

水滨之木，得彼小子。

夫何恶之，媵有莘之妇？

汤出重泉，夫何罪尤？

不胜心伐帝，夫谁使挑之？

会朝争盟，何践吾期？

苍鸟群飞，孰使萃之？

列击纣躬，叔旦不嘉。

何亲揆发，定周之命以咨嗟？

授殷天下，其位安施？

反成乃亡，其罪伊何？

争遣伐器，何以行之？

并驱击翼，何以将之？  
昭后成游，南土爰底。  
厥利惟何，逢彼白雉？  
穆王巧梅，夫何周流？  
环理天下，夫何索求？  
妖夫曳衒，何号于市？  
周幽谁诛？焉得夫褒姒？  
天命反侧，何罚何佑？  
齐桓九会，卒然身杀。  
彼王纣之躬，孰使乱惑？  
何恶辅弼，谗谄是服？  
比干何逆，而抑沉之？  
雷开何顺，而赐封之？  
何圣人之一德，卒其异方：  
梅伯受醢，箕子详狂？  
稷维元子，帝何竺之？  
投之於冰上，鸟何燠之？  
何冯弓挟矢，殊能将之？  
既惊帝切激，何逢长之？  
伯昌号衰，秉鞭作牧。



何令彻彼岐社，命有殷国？

迁藏就岐，何能依？

殷有惑妇，何所讥？

受赐兹醢，西伯上告。

何亲就上帝罚，殷之命以不救？

师望在肆，昌何识？

鼓刀扬声，后何喜？

武发杀殷，何所悒？

载尸集战，何所急？

伯林雉经，维其何故？

何感天抑墜，夫谁畏惧？

皇天集命，惟何戒之？

受礼天下，又使至代之？

初汤臣挚，后兹承辅。

何卒官汤，尊食宗绪？

勋阖、梦生，少离散亡。

何壮武厉，能流厥严？

彭铿斟雉，帝何飧？

受寿永多，夫何久长？

中央共牧，后何怒？

蜂蛾微命，力何固？

惊女采薇，鹿何祐？

北至回水，萃何喜？

兄有噬犬，弟何欲？

易之以百两，卒无禄？

薄暮雷电，归何忧？

厥严不奉，帝何求？

伏匿穴处，爰何云？

荆勋作师，夫何长？

悟过改更，我又何言？

吴光争国，久余是胜。

何环穿自闾社丘陵，爰出子文？

吾告堵敖以不长。

何试上自予，忠名弥彰？

## 九章 惜诵

---

惜诵以致愍兮，发愤以抒情。

所作忠而言之兮，指苍天以为正。

令五帝以折中兮，戒六神与向服。

俾山川以备御兮，命咎繇使听直。

竭忠诚以事君兮，反离群而赘疣。

忘儇媚以背众兮，待明君其知之。

言与行其可迹兮，情与貌其不变。

故相臣莫若君兮，所以证之不远。

吾谊先君而后身兮，羌众人之所仇也。

专惟君而无他兮，又众兆之所讎也。

壹心而不豫兮，羌不可保也。

疾亲君而无他兮，有招祸之道也。

思君其莫我忠兮，忽忘身之贱贫。

事君而不贰兮，迷不知宠之门。

忠何罪以遇罚兮，亦非余心之所志。

行不群以巅越兮，又众兆之所哈。

纷逢尤以离谤兮，謇不可释也。

情沉抑而不达兮，又蔽而莫之白也。

心郁邑余侘傺兮，又莫察余之中情。

固烦言不可结诒兮，愿陈志而无路。

退静默而莫余知兮，进号呼又莫吾闻。

申侘傺之烦惑兮，中闷瞀之饨々。

昔余梦登天兮，魂中道而无杭。

吾使厉神占之兮，曰：“有志极而无旁。”

终危独以离异兮，曰君可思而不可恃。

故众口其铄金兮，初若是而逢殆。

惩於羹者而吹齏兮，何不变此志也？

欲释阶而登天兮，犹有曩之态也。

众骇遽以离心兮，又何以为此伴也？

同极而异路兮，又何以为此援也？

晋申生之孝子兮，父信谗而不好。

行婞直而不豫兮，鲧功用而不就。

吾闻作忠以造怨兮，忽谓之过言。

九折臂而成医兮，吾至今而知其信然。

赠弋机而在上兮，罟罗张而在下。

设张辟以娱君兮，愿侧身而无所。

欲儵徊以干傺兮，恐重患而离尤。

欲高飞而远集兮，君罔谓女何之？

欲横奔而失路兮，坚志而不忍。

背膺牋以交痛兮，心郁结而纡轸。

搗木兰以矫蕙兮，申椒以为粮。

播江离与滋菊兮，愿春日以为糗芳。

恐情质之不信兮，故重著以自明。

矫兹媚以私处兮，愿曾思而远身。

## 九章 涉江

---

余幼好此奇服兮，年既老而不衰。

带长铗之陆离兮，冠切云之崔嵬。

被明月兮珮宝璐，世溷浊而莫余知兮。

吾方高驰而不顾，驾青虬兮骖白螭。

吾与重华游兮瑶之圃，登昆仑兮食玉英。

与天地兮同寿，与日月兮齐光。

哀南夷之莫吾知兮，旦余济乎江、湘。

乘鄂渚而反顾兮，欸秋冬之绪风。

步余马兮山皋，邸余车兮方林。

乘舲船余上沅兮，齐吴榜以击汰。

船容与而不进兮，淹回水而凝滞。

朝发枉渚兮，夕宿辰阳。

苟余心其端直兮，虽僻远之何伤！

入溱浦余儃徊兮，迷不知吾所如。

深林杳以冥冥兮，乃猿狖之所居。

山峻高以蔽日兮，下幽晦以多雨。

霰雪纷其无垠兮，云霏霏而承宇。

哀吾生之无乐兮，幽独处乎山中。

吾不能变心而从俗兮，固将愁苦而终穷。

接舆髡首兮，桑扈羸行。

忠不必用兮，贤不必以。

伍子逢殃兮，比干菹醢。

与前世而皆然兮，吾又何怨乎今之人！

余将董道而不豫兮，固将重昏而终身乱。

曰：

鸾鸟凤皇，日以远兮。

燕雀乌鹊，巢堂坛兮。

露申辛夷，死林薄兮。

腥臊并御，芳不得薄兮。

阴阳易位，时不当兮。

怀信侘傺，忽乎吾将行兮。

## 九章 哀郢

---

皇天之不纯命兮，何百姓之震愆？  
民离散而相失兮，方仲春而东迁。  
去故乡而就远兮，遵江、夏以流亡。  
出国门而轸怀兮，甲之晷吾以行。  
发郢都而去闾兮，怊荒忽其焉极？  
楫齐扬以容与兮，哀见君而不再得。  
望长楸而太息兮，涕淫淫其若霰。  
过夏首而西浮兮，顾龙门而不见。  
心婵媛而伤怀兮，眇不知其所蹊。  
顺风波以从流兮，焉洋洋而为客。  
凌阳侯之汜滥兮，忽翱翔之焉薄？  
心絀结而不解兮，思蹇产而不释。  
将运舟而下浮兮，上洞庭而下江。  
去终古之所居兮，今逍遥而来东。  
羌灵魂之欲归兮，何须臾而忘反！  
背夏浦而西思兮，哀故都之日远。  
登大坟以远望兮，聊以舒吾忧心。



哀州土之平乐兮，悲江介之遗风。

当陵阳之焉至兮，淼南渡之焉如？

曾不知夏之为丘兮，孰两东门之可芜？

心不怡之长久兮，忧与愁其相接。

惟郢路之遥远兮，江与夏之不可涉。

忽若去不信兮，至今九年而不复。

惨郁郁而不通兮，蹇侘傺而含感。

外承欢之约约兮，讵甚荏弱而难持。

忠湛湛而愿进兮，妒被离而鄢之。

尧、舜之抗行兮，了杳杳而薄天。

众谗人之嫉妒兮，被以不慈之伪名。

憎愜惓之修美兮，好夫人之忼慨。

众踈蹢而日进兮，美超远而逾迈。

乱曰：曼余目以流观兮，冀壹反之何时？

鸟飞反故乡兮，狐死必首丘。

信非吾罪而弃逐兮，何日夜而忘之？

## 九章 抽思

---

心郁郁之忧思兮，独永叹乎增伤。  
思蹇产之不释兮，曼遭夜之方长。  
悲秋风之动容兮，何回极之浮浮！  
数惟蓀之多怒兮，伤余心之忧忧。  
愿摇起而横奔兮，览民尤以自镇。  
结微情以陈辞兮，矫以遗夫美人。  
昔君与我成言兮，曰：“黄昏以为期。”  
羌中道而回畔兮，反既有此他志。  
憊吾以其美好兮，览余以其修姱。  
与余言而不信兮，盖为余而造怒。  
愿承閒而自察兮，心震悼而不敢。  
悲夷犹而冀进兮，心怛伤之憺々。  
兹历情以陈辞兮，蓀详聋而不闻。  
固切人之不媚兮，众果以我为患。  
初吾所陈之耿著兮，岂不至今其庸亡？  
何独乐斯之蹇蹇兮？愿蓀美之可完。  
望三五以为像兮，指彭咸以为仪。

夫何极而不至兮，故远闻而难亏。

善不由外来兮，名不可以虚作。

孰无施而有报兮，孰不实而有获？

少歌曰：与美人抽怨兮，并日夜而无正。

僇吾以其美好兮，敖朕辞而不听。

倡曰：有鸟自南兮，来集汉北。

好姱佳丽兮，胖独处此异域。

既惻独而不群兮，又无良媒在其侧。

道卓远而日忘兮，愿自申而不得。

望北山而流涕兮，临流水而太息。

望孟夏之短夜兮，何晦明之若岁！

惟郢路之辽远兮，魂一夕而九逝。

曾不知路之曲直兮，南指月与列星。

愿径逝而不得兮，魂识路之营营。

何灵魂之信直兮，人之心不与吾心同！

理弱而媒不通兮，尚不知余之从容。

乱曰：长濛湍流，溯江潭兮。

狂顾南行，聊以娱心兮。

轸石崴嵬，蹇吾愿兮。

超回志度，行隐进兮。

低徊夷犹，宿北姑兮。

烦冤瞽容，实沛徂兮。

愁叹苦神，灵遥思兮。

路远处幽，又无行媒兮。

道思作颂，聊以自救兮。

忧心不遂，斯言谁告兮！

## 九章 怀沙

---

滔滔孟夏兮，草木莽莽。

伤怀永哀兮，汨沮南土。

眇兮杳杳，孔静幽默。

郁结纆轸兮，离愍而长鞠。

抚情效志兮，冤屈而自抑。

刳方以为圜兮，常度未替。

易初本迪兮，君子所鄙。

章画志墨兮，前图未改。

内厚质正兮，大人所晟。

巧倕不斫兮，孰察其拨正。

玄文处幽兮，矇眊谓之不章。

离娄微睇兮，瞽谓之不明。

变白以为黑兮，倒上以为下。

凤皇在笱兮，鸡鹜翔舞。

同糅玉石兮，一概而相量。

夫惟党人鄙固兮，羌不知余之所臧。

任重载盛兮，陷滞而不济。

怀瑾握瑜兮，穷不知所示。

邑犬群吠兮，吠所怪也。

非俊疑杰兮，固庸态也。

文质疏内兮，众不知余之异采。

材朴委积兮，莫知余之所有。

重仁袭义兮，谨厚以为丰。

重华不可遯兮，孰知余之从容！

古固有不并兮，岂知何其故！

汤、禹久远兮，邈而不可慕。

惩连改忿兮，抑心而自强。

离愍而不迁兮，愿志之有像。

进路北次兮，日昧昧其将暮。

舒忧娱哀兮，限之以大故。

乱曰：浩浩沅、湘，分流汨兮。

修路幽蔽，道远忽兮。

怀质抱情，独无匹兮。

伯乐既没，骥焉程兮。

民生稟命，各有所错兮。

定心广志，余何畏惧兮！

曾伤爰哀，永叹喟兮。

世溷浊莫吾知，人心不可谓兮。

知死不可让，愿勿爱兮。

明告君子，吾将以为类兮。

## 九章 思美人

---

思美人兮，揽涕而伫眙。

媒绝路阻兮，言不可结而诒。

蹇蹇之烦冤兮，陷滞而不发。

申旦以舒中情兮，志沉菀而莫达。

愿寄言於浮云兮，遇丰隆而不将。

因归鸟而致辞兮，羌迅高而难当。

高辛之灵晟兮，遭玄鸟而致诒。

欲变节以从俗兮，媿易初而屈志。

独历年而离愍兮，羌冯心犹未化。

宁隐闵而寿考兮，何变易之可为。

知前辙之不遂兮，未改此度。

车既覆而马颠兮，蹇独怀此异路。

勒骐骥而更驾兮，造父为我操之。

迁逶次而勿驱兮，聊假日以须时。

指嶓冢之西隈兮，与纁黄以为期。

开春发岁兮，白日出之悠悠。

吾将荡志而愉乐兮，遵江、夏以娱忧。



揽大薄之芳茝兮，搴长洲之宿莽。

惜吾不及古人兮，吾谁与玩此芳草。

解萹薄与杂菜兮，备以为交佩。

佩缤纷以缭转兮，遂萎绝而离异。

吾且傴偻以娱忧兮，观南人之变态。

窃快在其中心兮，扬厥凭而不俟。

芳与泽其杂糅兮，羌芳华自中出。

纷郁郁其远蒸兮，满内而外扬。

情与质信可保兮，羌居蔽而闻章。

令薜荔以为理兮，惮举趾而缘木。

因芙蓉而为媒兮，惮褰裳而濡足。

登高吾不说兮，入下吾不能。

固朕形之不服兮，然容与而狐疑。

广遂前画兮，未改此度也。

命则处幽吾将罢兮，愿及白日之未暮也。

独茕茕而南行兮，思彭咸之故也。

## 九章 惜往日

---

惜往日之曾信兮，受命诏以昭诗。  
奉先功以照下兮，明法度之嫌疑。  
国富强而法立兮，属贞臣而日嫉。  
秘密事之载心兮，虽过失犹弗治。  
心纯庞而不泄兮，遭讒人而嫉之。  
君含怒而待臣兮，不清澂其然否。  
蔽晦君之聪明兮，虚惑误又以欺。  
弗参验以考实兮，远迁臣而弗思。  
信讒谀之溷浊兮，晟气志而过之。  
何贞臣之无罪兮，被讟谤而见尤！  
惭光景之诚信兮，身幽隐而备之。  
临沅、湘之玄渊兮，遂自忍而沉流。  
卒没身而绝名兮，惜靡君之不昭。  
君无度而弗察兮，使芳草为薺幽。  
焉舒情而抽信兮，恬死亡而不聊。  
独鄢靡而蔽隐兮，使贞臣为无由。  
闻百里之为虏兮，伊尹烹於庖厨。

吕望屠於朝歌兮，甯戚歌而饭牛。  
不逢汤、武与桓、缪兮，世孰云而知之！  
吴信谗而弗味兮，子胥死而后忧。  
介子忠而立枯兮，文君寤而追求；  
封介山而为之禁兮，报大德之优游。  
思久故之亲身兮，因缟素而哭之。  
或忠信而死节兮，或詖谏而不疑。  
弗省察而按实兮，听谗人之虚辞。  
芳与泽其杂糅兮，孰申旦而别之？  
何芳草之早殒兮，微霜降而下戒。  
谅聪不明而蔽靡兮，使谗谀而日得。  
自前世之嫉贤兮，谓蕙若其不可佩。  
妒佳冶之芬芳兮，嫫母姣而自好。  
虽有西施之美容兮，谗妒入以自代。  
愿陈情以白行兮，得罪过之不意。  
情冤见之日明兮，如列宿之错置。  
乘骐骥而驰骋兮，无辔衔而自载。  
乘汜淝以下流兮，无舟楫而自备。  
背法度而心治兮，辟与此其无异。  
宁溘死而流亡兮，恐祸殃之有再。

不毕辞而赴渊兮，惜靡君之不识。

## 九章 橘颂

---

后皇嘉树，橘徕服兮。

受命不迁，生南国兮。

深固难徙，更壹志兮。

绿叶素荣，纷其可喜兮。

曾枝剌棘，圆果抟兮。

青黄杂糅，文章烂兮。

精色内白，类任道兮。

纷缊宜修，姱而不丑兮。

嗟尔幼志，有以异兮。

独立不迁，岂不可喜兮。

深固难徙，廓其无求兮。

苏世独立，横而不流兮。

闭心自慎，不终失过兮。

秉德无私，参天地兮。

愿岁并谢，与长友兮。

淑离不淫，梗其有理兮。

年岁虽少，可师长兮。

行比伯夷，置以为像兮。

## 九章 悲回风

---

悲回风之摇蕙兮，心冤结而内伤。

物有微而陨性兮，声有隐而先倡。

夫何彭咸之造思兮，暨志介而不忘！

万变其情岂可盖兮，孰虚伪之可长！

鸟兽鸣以号群兮，草苴比而不芳。

鱼葺鳞以自别兮，蛟龙隐其文章。

故荼荠不同亩兮，兰茝幽而独芳。

惟佳人之永都兮，更统世而自贲。

眇远志之所及兮，怜浮云之相羊。

介眇志之所惑兮，窃赋诗之所明。

惟佳人之独怀兮，折若椒以自处。

曾歔歔之嗟嗟兮，独隐伏而思虑。

涕泣交而凄凄兮，思不眠以至曙。

终长夜之曼曼兮，掩此哀而不去。

寤从容以周流兮，聊逍遥以自恃。

伤太息之愍怜兮，气於邑而不可止。

糺思心以为纆兮，编愁苦以为膺。

折若木以蔽光兮，随飘风之所仍。  
存仿佛而不见兮，心踊跃其若汤。  
抚珮衽以案志兮，超惘惘而遂行。  
岁晷晷其若颓兮，时亦冉冉而将至。  
蘋蘩藁而节离兮，芳以歇而不比。  
怜思心之不可惩兮，证此言之不可聊。  
宁溘死而流亡兮，不忍此心之常愁。  
孤子吟而抆泪兮，放子出而不还。  
孰能思而不隐兮，照彭咸之所闻。  
登石峦以远望兮，路眇眇之默默。  
入景响之无应兮，闻省想而不可得。  
愁郁郁之无快兮，居戚戚而不可解。  
心鞿羁而不开兮，气缭绕而自缔。  
穆眇眇之无垠兮，莽芒芒之无仪。  
声有隐而相感兮，物有纯而不可为。  
邈蔓蔓之不可量兮，缥绵绵之不可纡。  
愁悄悄之常悲兮，翩冥冥之不可娱。  
凌大波而流风兮，託彭咸之所居。  
上高岩之峭岸兮，处雌蜺之标颠。  
据青冥而攄虹兮，遂儻忽而扞天。



吸湛露之浮凉兮，漱凝霜之雰雰。

依风穴以自息兮，忽倾寤以婵媛。

冯昆仑以瞰雾兮，隐岷山以清江。

惮涌湍之礚々兮，听波声之汹汹。

纷容容之无经兮，罔芒芒之无纪。

轧洋洋之无从兮，驰委移之焉止。

漂翻翻其上下兮，翼遥遥其左右。

汜滴滴其前后兮，伴张驰之信期。

观炎气之相仍兮，窥烟液之所积。

悲霜雪之俱下兮，听潮水之相击。

借光景以往来兮，施黄棘之枉策。

求介子之所存兮，见伯夷之放迹。

心调度而弗去兮，刻著志之无适。

曰：

吾怨往昔之所冀兮，悼来者之愁々。

浮江、淮而入海兮，从子胥而自适。

望大河之洲渚兮，悲申徒之抗迹。

骤谏君而不听兮，重任石之何益！

心絙结而不解兮，思蹇产而不释。

远游

悲时俗之迫厄兮，愿轻举而远游。  
质菲薄而无因兮，焉託乘而上浮？  
遭沉浊而汙秽兮，独郁结其谁语！  
夜耿耿而不寐兮，魂营营而至曙。  
惟天地之无穷兮，哀人生之长勤。  
往者余弗及兮，来者吾不闻。  
步徙倚而遥思兮，怊惝恍而乖怀。  
意荒忽而流荡兮，心愁悽而增悲。  
神儵忽而不反兮，形枯槁而独留。  
内惟省以端操兮，求正气之所由。  
漠虚静以恬愉兮，澹无为而自得。  
闻赤松之清尘兮，愿承风乎遗则。  
贵真人之休德兮，美往世之登仙。  
与化去而不见兮，名声著而日延。  
奇傅说之託辰星兮，羨韩众之得一。  
形穆穆以浸远兮，离人群而遁逸。  
因气变而遂曾举兮，忽神奔而鬼怪。  
时仿佛以遥见兮，精皎皎以往来。  
超氛埃而淑垂兮，终不反其故都。  
免众患而不惧兮，世莫知其所如。

恐天时之代序兮，耀灵晔而西征。

微霜降而下沦兮，悼芳草之先薤。

聊仿佯而逍遥兮，永历年而无成！

谁可与玩斯遗芳兮？长乡风而舒情。

高阳邈以远兮，余将焉所程？

重曰：春秋忽其不淹兮，奚久留此故居？

轩辕不可攀援兮，吾将从王乔而娱戏！

餐六气而饮沆瀣兮，漱正阳而含朝霞。

保神明之清澄兮，精气入而粗秽除。

顺凯风以从游兮，至南巢而壹息。

见王子而宿之兮，审壹气之和德。

曰：“道可受兮，不可传；

其小无内兮，其大无垠；

毋滑而魂兮，彼将自然；

壹气孔神兮，於中夜存；

虚以待之兮，无为之先；

庶类以成兮，此德之门。”

闻至贵而遂徂兮，忽乎吾将行。

仍羽人於丹丘兮，留不死之旧乡。

朝濯发於汤谷兮，夕晞余身兮九阳。

吸飞泉之微液兮，怀琬琰之华英。  
玉色頽以晚颜兮，精醇粹而始壮。  
质销铄以约约兮，神要眇以淫放。  
嘉南州之炎德兮，丽桂树之冬荣。  
山萧条而无兽兮，野寂漠其无人。  
载营魄而登霞兮，掩浮云而上征。  
命天阍其开关兮，排阊阖而望予。  
召丰隆使先导兮，问大微之所居。  
集重阳入帝宫兮，造旬始而观清都。  
朝发轫於太仪兮，夕始临乎於微闾。  
屯余车之万乘兮，纷容与而并驰。  
驾八龙之婉婉兮，载云旗之逶蛇。  
建雄虹之采旄兮，五色杂而炫耀。  
服偃蹇以低昂兮，骖连蜷以骄骜。  
骑胶葛以杂乱兮，斑漫衍而方行；  
撰余辔而正策兮，吾将过乎句芒。  
历太皓以右转兮，前飞廉以启路。  
阳杲杲其未光兮，凌天地以径度。  
风伯为余先驱兮，氛埃辟而清凉。  
凤凰翼其承旂兮，遇蓐收乎西皇。

揽彗星以为旂兮，举斗柄以为麾。  
叛陆离其上下兮，游惊雾之流波。  
时暖暱其曛莽兮，召玄武而奔属。  
后文昌使掌行兮，选署众神以并轂。  
路曼曼其修远兮，徐弭节而高厉。  
左雨师使径待兮，右雷公以为卫。  
欲度世以忘归兮，意恣睢以担拊。  
内欣欣而自美兮，聊媮娱以淫乐。  
涉青云以汎滥游兮，忽临睨夫旧乡。  
仆夫怀余心悲兮，边马顾而不行。  
思旧故以想像兮，长太息而掩涕。  
汜容与而遐举兮，聊抑志而自弭。  
指炎神而直驰兮，吾将往乎南疑。  
览方外之荒忽兮，沛罔瀆而自浮。  
祝融戒而蹕御兮，腾告鸾鸟迎宓妃。  
张《咸池》奏《承云》兮，二女御《九韶》歌。  
使湘灵鼓瑟兮，令海若舞冯夷。  
玄螭虫象并出进兮，形繆虬而透蛇。  
雌蜺便娟以增挠兮，鸾鸟轩翥而翔飞。  
音乐博衍无终极兮，焉乃逝以徘徊。

舒并节以驰骛兮，遑绝垠乎寒门。

轶迅风於清源兮，从颢顼乎增冰。

历玄冥以邪径兮，乘閒维以反顾。

召黔羸而见之兮，为余先乎平路。

经营四荒兮，周流六漠：

上至列缺兮，降望大壑。

下峥嵘而无地兮，上寥廓而无天。

视儻忽而无见兮，听惝怳而无闻。

超无为以至清兮，与泰初而为邻。

卜居

屈原既放，三年不得复见，竭知尽忠，而蔽鄣於谗，心烦虑乱，不知所从。

乃往见太卜郑詹尹曰：“余有所疑，愿因先生决之。”詹尹乃端策拂龟曰：“君将何以教之？”屈原曰：“吾宁悃悃款款，朴以忠乎？

将送往劳来，斯无穷乎？

宁诛锄草茅，以力耕乎？

将游大人，以成名乎？

宁正言不讳，以危身乎？

将从俗富贵，以媮生乎？

宁超然高举，以保真乎？

将呬訾栗斯，喔咿嚅唅，以事妇人乎？

宁廉洁正直，以自清乎？

将突梯滑稽，如脂如韦，以洁楹乎？

宁昂昂若千里之驹乎？

将汜汜若水中之鳧，

与波上下，偷以全吾躯乎？

宁与骐驎亢轭乎？将随騊马之迹乎？

宁与黄鹄比翼乎？将与鸡鹜争食乎？

此孰吉孰凶？何去何从？

世溷浊而不清：

蝉翼为重，千钧为轻；黄钟毁弃，瓦釜雷鸣；

谗人高张，贤士无名。

吁嗟默默兮，谁知吾之廉贞？”

詹尹乃释策而谢曰：“夫尺有所短，寸有所长，物有所不足，智有所不明，数有所不逮，神有所不通，用君之心，行君之意。龟策诚不能知事。”

渔父

屈原既放，游於江潭，行吟泽畔，颜色憔悴，形容枯槁。渔父见而问之曰：“子非三闾大夫与？何故至於斯！”

屈原曰：“举世皆浊我独清，众人皆醉我独醒，是以见放！”

渔父曰：“圣人不凝滞於物，而能与世推移。

世人皆浊，何不泥其泥而扬其波？

众人皆醉，何不鋪其糟而歠其醪？

何故深思高举，自令放为？”

屈原曰：“吾闻之，新沐者必弹冠，新浴者必振衣；

安能以身之察察，受物之汶汶者乎！

宁赴湘流，葬於江鱼之腹中。

安能以皓皓之白，而蒙世俗之尘埃乎！”

渔父莞尔而笑，鼓枻而去，乃歌曰：

“沧浪之水清兮，可以濯吾缨。

沧浪之水浊兮，可以濯吾足。”

遂去不复与言。

九辯

悲哉！秋之为气也。

萧瑟兮，草木摇落而变衰。

憭栗兮，若在远行。

登山临水兮，送将归。

沅寥兮，天高而气清；寂寥兮，收潦而水清。

慄慄增欷兮，薄寒之中人；

怆怳愴恨兮，去故而就新；

坎廪兮，贫士失职而志不平；

廓落兮，羈旅而无友生；惆怅兮，而私自怜。



燕翩翩其辞归兮，蝉寂漠而无声。  
雁靡靡而南游兮，鸱鸡啁哳而悲鸣。  
独申旦而不寐兮，哀蟋蟀之宵征。  
时亹亹而过中兮，蹇淹留而无成。  
悲忧穷戚兮独处廓，有美一人兮心不绎；  
去乡离家兮徕远客，超逍遥兮今焉薄！  
专思君兮不可化，君不知兮可奈何！  
蓄怨兮积思，心烦憺兮忘食事。  
愿一见兮道余意，君之心兮与余异。  
车既驾兮謁而归，不得见兮心伤悲。  
倚结軫兮长太息，涕潺湲兮下霑轼。  
慷慨绝兮不得，中瞀乱兮迷惑。  
私自怜兮何极？心怊怊兮谅直。  
皇天平分四时兮，窃独悲此廩秋。  
白露既下百草兮，奄离披此梧楸。  
去白日之昭昭兮，袭长夜之悠悠。  
离芳蔼之方壮兮，余萎约而悲愁。  
秋既先戒以白露兮，冬又申之以严霜。  
收恢台之孟夏兮，然歆僚而沉藏。  
叶菸邑而无色兮，枝烦挈而交横。

颜淫溢而将罢兮，柯仿佛而萎黄。  
蓊樛惨之可哀兮，形销铄而瘵伤。  
惟其纷糅而将落兮，恨其失时而无当。  
揽騑辔而下节兮，聊逍遥以相伴。  
岁忽忽而遒尽兮，恐余寿之弗将。  
悼余生之不时兮，逢此世之伧攘。  
澹容与而独倚兮，蟋蟀鸣此西堂。  
心怵惕而震荡兮，何所忧之多方。  
印明月而太息兮，步列星而极明。  
窃悲夫蕙华之曾敷兮，纷旖旎乎都房。  
何曾华之无实兮，从风雨而飞飏！  
以为君独服此蕙兮，羌无以异於众芳。  
闵奇思之不通兮，将去君而高翔。  
心闵怜之惨悽兮，愿一见而有明。  
重无怨而生离兮，中结轸而增伤。  
岂不郁陶而思君兮？君之门以九重！  
猛犬狺狺而迎吠兮，关梁闭而不通。  
皇天淫溢而秋霖兮，后土何时而得漑？  
块独守此无泽兮，仰浮云而永叹！  
何时俗之工巧兮？背绳墨而改错！

卻騏驥而不乘兮，策駑駘而取路。

当世岂无騏驥兮，誠莫之能善御。

见执轡者非其人兮，故驹跳而远去。

鳬雁皆唼夫梁藻兮，凤愈飘翔而高举。

圜凿而方枘兮，吾固知其鉏鋸而难入。

众鸟皆有所登栖兮，凤独遑遑而无所集。

愿衔枚而无言兮，尝被君之渥洽。

太公九十乃显荣兮，誠未遇其匹合。

谓騏驥兮安归？谓凤皇兮安栖？

变古易俗兮世衰，今之相者兮举肥。

騏驥伏匿而不见兮，凤皇高飞而不下。

鸟兽犹知怀德兮，何云贤士之不处？

驥不骤进而求服兮，凤亦不贪餒而妄食。

君弃远而不察兮，虽愿忠其焉得？

欲寂漠而绝端兮，窃不敢忘初之厚德。

独悲愁其伤人兮，冯郁郁其何极？

霜露惨悽而交下兮，心尚幸其弗济。

霰雪雰糅其增加兮，乃知遭命之将至。

愿微幸而有待兮，泊莽莽与野草同死。

愿自直而径往兮，路壅绝而不通。

欲循道而平驱兮，又未知其所从。  
然中路而迷惑兮，自厌按而学诵。  
性愚陋以褊浅兮，信未达乎从容。  
窃美申包胥之气晟兮，恐时世之不固。  
何时俗之工巧兮？灭规矩而改凿！  
独耿介而不随兮，愿慕先圣之遗教。  
处浊世而显荣兮，非余心之所乐。  
与其无义而有名兮，宁穷处而守高。  
食不媮而为饱兮，衣不苟而为温。  
窃慕诗人之遗风兮，愿託志乎素餐。  
蹇充倔而无端兮，泊莽莽而无垠。  
无衣裘以御冬兮，恐溘死不得见乎阳春。  
靓杪秋之遥夜兮，心繚悷而有哀。  
春秋遄遄而日高兮，然惆怅而自悲。  
四时递来而卒岁兮，阴阳不可与俪偕。  
白日<日宛>晚其将入兮，明月销铄而减毁。  
岁忽忽而遒尽兮，老冉冉而愈弛。  
心摇悦而日幸兮，然怊怅而无冀。  
中慊恻之悽怆兮，长太息而增欷。  
年洋洋以日往兮，老嶮廓而无处。

事亹亹而覬进兮，蹇淹留而踌躇。  
何汨滥之浮云兮？森靡蔽此明月。  
忠昭昭而愿见兮，然露晞而莫达。  
愿皓日之显行兮，云蒙蒙而蔽之。  
窃不自料而愿忠兮，或黜点而汙之。  
尧舜之抗行兮，了冥冥而薄天。  
何险巇之嫉妒兮？被以不慈之伪名。  
彼日月之照明兮，尚黯黩而有瑕。  
何况一国之事兮，亦多端而胶加。  
被荷裋之晏晏兮，然潢洋而不可带。  
既骄美而伐武兮，负左右之耿介。  
憎愠惓之修美兮，好夫人之慷慨。  
众蹀躞而日进兮，美超远而逾迈。  
农夫辍耕而容与兮，恐田野之芜秽。  
事绵绵而多私兮，窃悼后之危败。  
世雷同而炫曜兮，何毁誉之昧昧！  
今修饰而窥镜兮，后尚可以窜藏。  
愿寄言夫流星兮，羌儵忽而难当。  
卒靡蔽此浮云，下暗漠而无光。  
尧舜皆有所举任兮，故高枕而自適。

谅无怨於天下兮，心焉取此怵惕？  
乘骐驎之浏浏兮，驭安用夫强策？  
谅城郭之不足恃兮，虽重介之何益？  
遭翼翼而无终兮，饨惛々而愁约。  
生天地之若过兮，功不成而无效。  
愿沉滞而不见兮，尚欲布名乎天下。  
然潢洋而不遇兮，直恂而自苦。  
莽洋洋而无极兮，忽翱翔之焉薄？  
国有骥而不知乘兮，焉皇皇而更索？  
甯戚讴於车下兮，桓公闻而知之。  
无伯乐之相善兮，今谁使乎誉之？  
罔流涕以聊虑兮，惟著意而得之。  
纷纯纯之愿忠兮，妒被离而鄣之。  
愿赐不肖之躯而别离兮，放游志乎云中。  
乘精气之抟抟兮，骖诸神之湛湛。  
骖白霓之习习兮，历群灵之丰丰。  
左朱雀之茷茷兮，右苍龙之躡々。  
属雷师之阗阗兮，通飞廉之衙衙。  
前轻辇之锵锵兮，后辎乘之从从。  
载云旗之委蛇兮，扈屯骑之容容。

计专专之不可化兮，愿遂推而为臧。

赖皇天之厚德兮，还及君之无恙。

招魂

朕幼清以廉洁兮，身服义而未沫。

主此盛德兮，牵於俗而芜秽。

上无所考此盛德兮，长离殃而愁苦。

帝告巫阳曰：“有人在下，我欲辅之。

魂魄离散，汝筮予之。”

巫阳对曰：“掌梦上帝其命难从。

若必筮予之，恐后之谢，不能复用巫阳焉。”

乃下招曰：魂兮归来！

去君之恒幹，何为乎四方些？

舍君之乐处，而离彼不祥些。

魂兮归来！东方不可以讬些。

长人千仞，惟魂是索些。

十日代出，流金铄石些。

彼皆習之，魂往必释些。

归来归来！不可以讬些。

魂兮归来！南方不可以止些。

雕题黑齿，得人肉以祀，以其骨为醢些。

蝮蛇蓁蓁，封狐千里些。

雄虺九首，往来儵忽，吞人以益其心些。

归来归来！不可以久淫些。

魂兮归来！西方之害，流沙千里些。

旋入雷渊，靡散而不可止些。

幸而得脱，其外旷宇些。

赤蚁若象，玄蜂若壶些。

五谷不生，藁菅是食些。

其土烂人，求水无所得些。

彷徨无所倚，广大无所极些。

归来归来！恐自遗贼些。

魂兮归来！北方不可以止些。

增冰峨峨，飞雪千里些。

归来归来！不可以久些。

魂兮归来！君无上天些。

虎豹九关，啄害下人些。

一夫九首，拔木九千些。

豺狼从目，往来僦々些。

悬人以娒，投之深渊些。

致命於帝，然后得瞑些。



归来归来！往恐危身些。

魂兮归来！君无下此幽都些。

土伯九约，其角觺々些。

敦肤血拇，逐人𪔐々些。

参目虎首，其身若牛些。

此皆甘人，归来归来！恐自遗灾些。

魂兮归来！入修门些。

工祝招君，背行先些。

秦篝齐缕，郑绵络些。

招具该备，永啸呼些。

魂兮归来！反故居些。

天地四方，多贼奸些。

像设君室，静閒安些。

高堂邃宇，槛层轩些。

层台累榭，临高山些。

网户朱缀，刻方连些。

冬有突厦，夏室寒些。

川谷径复，流潺湲些。

光风转蕙，汜崇兰些。

经堂入奥，朱尘筵些。

砥室翠翘，挂曲琼些。  
翡翠珠被，烂齐光些。  
蒨阿拂壁，罗幃张些。  
纂组绮縠，结琦璜些。  
室中之观，多珍怪些。  
兰膏明烛，华容备些。  
二八侍宿，射递代些。  
九侯淑女，多迅众些。  
盛鬋不同制，实满宫些。  
容态好比，顺弥代些。  
弱颜固植，蹇其有意些。  
姱容脩态，絳洞房些。  
蛾眉曼睩，目腾光些。  
靡颜膩理，遗视眇些。  
离榭脩幕，侍君之閒些。  
翡翠翠帐，饰高堂些。  
红壁沙版，玄玉之梁些。  
仰观刻桷，画龙蛇些。  
坐堂伏檻，临曲池些。  
芙蓉始发，杂芰荷些。

紫茎屏风，文缘波些。  
文异豹饰，侍陂阤些。  
轩轳既低，步骑罗些。  
兰薄户树，琼木篱些。  
魂兮归来！何远为些？  
室家遂宗，食多方些。  
稻粢穠麦，挈黄粱些。  
大苦咸酸，辛甘行些。  
肥牛之腱，臠若芳些。  
和酸若苦，陈吴羹些。  
胹鳖炮羔，有柘浆些。  
鹄酸臠臠，煎鸿鸽些。  
露鸡臠蠃，厉而不爽些。  
粃敝蜜餌，有餼餼些。  
瑶浆蜜勺，实羽觞些。  
挫糟冻饮，酎清凉些。  
华酌既陈，有琼浆些。  
归反故室，敬而无妨些。  
肴羞未通，女乐罗些。  
陈钟按鼓，造新歌些。

《涉江》、《采菱》，发《扬荷》些。

美人既醉，朱颜酡些。

娉光眇视，目曾波些。

被文服纤，丽而不奇些。

长发曼鬋，艳陆离些。

二八齐容，起郑舞些。

衽若交竿，抚案下些。

竽瑟狂会，搥鸣鼓些。

宫庭震惊，发《激楚》些。

吴歈蔡讴，奏大吕些。

士女杂坐，乱而不分些。

放陈女组缨，班其相纷些。

郑、卫妖玩，来杂陈些。

《激楚》之结，独秀先些。

菎蔽象棋，有六簿些。

分曹并进，遒相迫些。

成枭而牟，呼五白些。

晋制犀比，费白日些。

铿锺摇虞，揄梓瑟些。

娱酒不废，沉日夜些。

兰膏明烛，华车登错些。

结撰至思，兰芳假些。

人有所极，同心赋些。

酎饮尽欢，乐先故些。

魂兮归来！反故居些。

乱曰：献岁发春兮，汨吾南征。

蓁蘋齐叶兮，白芷生。

路贯庐江兮，左长薄。

倚沼畦瀛兮，遥望博。

青骊结驷兮，齐千乘，悬火延起兮，玄颜烝。

步及骤处兮，诱骋先，抑骛若通兮，引车右还。

与王趋梦兮，课后先。

君王亲发兮，惮青兕。

朱明承夜兮，时不可淹。

皋兰被径兮，斯路渐。

湛湛江水兮，上有枫。

目极千里兮，伤春心。

魂兮归来，哀江南。

大招

青春受谢，白日昭只。

春气奋发，万物遽只。

冥凌兮夹行，魂无逃只。

魂魄归徕！无远遥只。

魂乎归徕！无东无西，无南无北只。

东有大海，溺水浹々只。

螭龙并流，上下悠悠只。

雾雨淫淫，白皓胶只。

魂乎无东！汤谷寂寥只。

魂乎无南！南有炎火千里，蝮蛇蜒只。

山林险隘，虎豹蜿只。

鰐鰕短狐，王虺蹇只。

魂乎无南！蜮伤躬只。

魂乎无西！西方流沙，漭洋洋只。

豕首纵目，被发鬢只。

长爪踞牙，诃矣笑狂只。

魂乎无西！多害伤只。

魂乎无北！北有寒山，遑龙赭只。

代水不可涉，深不可测只。

天白颢颢，寒凝凝只。

魂乎无往！盈北极只。

魂魄归徠！间以静只。

自恣荆楚，安以定只。

逞志究欲，心意安只。

穷身永乐，年寿延只。

魂乎归徠！乐不可言只。

五穀六仞，设菰梁只。

鼎臠盈望，和致芳只。

内鸽鸽鹄，味豺羹只。

魂乎归徠！恣所尝只。

鲜蠃甘鸡，和楚酪只。

醢豚苦狗，脍苴蓴只。

吴酸蒿蒌，不沾薄只。

魂兮归徠！恣所择只。

炙鹄烝鳧，黏鹑陈父只。

煎鱠<月雀>雀，遽爽存只。

魂乎归徠！丽以先只。

四酎并孰，不涩嗑只。

清馨冻饮，不歆役只。

吴醴白蘘，和楚沥只。

魂乎归徠！不遽惕只。

代、秦、郑、卫，鸣竽张只。

伏戏《驾辩》，楚《劳商》只。

讴和《扬阿》，赵箫倡只。

魂乎归徕！定空桑只。

二八接舞，投诗赋只。

叩钟调磬，娱人乱只。

四上竞气，极声变只。

魂乎归徕！听歌譟只。

朱唇皓齿，嫔以姱只。

比德好閒，习以都只。

丰肉微骨，调以娱只。

魂乎归徕！安以舒只。

嫫目宜笑，蛾眉曼只。

容则秀雅，稚朱颜只。

魂乎归徕！静以安只。

嫫脩滂浩，丽以佳只。

曾颊倚耳，曲眉规只。

滂心绰态，姣丽施只。

小腰秀颈，若鲜卑只。

魂乎归徕！思怨移只。



易中利心，以动作只。

粉白黛黑，施芳泽只。

长袂拂面，善留客只。

魂乎归徕！以娱昔只。

青色直眉，美目嫋只。

靦辅奇牙，宜笑嚙只。

丰肉微骨，体便娟只。

魂乎归徕！恣所便只。

夏屋广大，沙堂秀只。

南房小坛，观绝雷只。

曲屋步壙，宜扰畜只。

腾驾步游，猎春囿只。

琼毂错衡，英华假只。

茝兰桂树，郁弥路只。

魂乎归徕！恣志虑只。

孔雀盈园，畜鸾皇只。

鵙鸿群晨，杂鹜鸽只。

鸿鹄代游，曼鹑鹑只。

魂乎归徕！凤皇翔只。

曼泽怡面，血气盛只。

永宜厥身，保寿命只。

室家盈廷，爵禄盛只。

魂乎归徠！居室定只。

接径千里，出若云只。

三圭重侯，听类神只。

察笃天隐，孤寡存只。

魂乎归徠！正始昆只。

田邑千畛，人阜昌只。

美冒众流，德泽章只。

先威后文，善美明只。

魂乎归徠！赏罚当只。

名声若日，照四海只。

德誉配天，万民理只。

北至幽陵，南交趾只。

西薄羊肠，东穷海只。

魂乎归徠！尚贤士只。

发政献行，禁苛暴只。

举杰压陛，诛讥罢只。

直嬴在位，近禹麾只。

豪杰执政，流泽施只。

魂乎归徕，国家为只。

雄雄赫赫，天德明只。

三公穆穆，登降堂只。

诸侯毕极，立九卿只。

昭质既设，大侯张只。

执弓挟矢，揖辞让只。

魂乎徕归！尚三王只。

惜誓

惜余年老而日衰兮，岁忽忽而不反。

登苍天而高举兮，历众山而日远。

观江河之纡曲兮，离四海之霑濡。

攀北极而一息兮，吸沆瀣以充虚。

飞朱鸟使先驱兮，驾太一之象舆。

苍龙蚬虬於左骖兮，白虎骋而为右騑。

建日月以为盖兮，载玉女於后车。

驰骛於杳冥之中兮，休息虯昆仑之墟。

乐穷极而不厌兮，愿从容虯神明。

涉丹水而驰骋兮，右大夏之遗风。

黄鹄之一举兮，知山川之纡曲。

再举兮，睹天地之圜方。

临中国之众人兮，讫回飙乎尚羊。  
乃至少原之野兮，赤松、王乔皆在旁。  
二子拥瑟而调均兮，余因称乎清商。  
澹然而自乐兮，吸众气而翱翔。  
念我长生而久仙兮，不如反余之故乡。  
黄鹄后时而寄处兮，鸱枭群而制之。  
神龙失水而陆居兮，为蝼蚁之所裁。  
夫黄鹄神龙犹如此兮，况贤者之逢乱世哉。  
寿冉冉而日衰兮，固僵回而不息。  
俗流从而不止兮，众枉聚而矫直。  
或偷合而苟进兮，或隐居而深藏。  
苦称量之不审兮，同权概而就衡。  
或推迁而苟容兮，或直言之谔谔。  
伤诚是之不察兮，并纫茅丝以为索。  
方世俗之幽昏兮，眩白黑之美恶。  
放山渊之龟玉兮，相与贵夫砾石。  
梅伯数谏而至醢兮，来革顺志而用国。  
悲仁人之尽节兮，反为小人之所贼。  
比干忠谏而剖心兮，箕子被发而佯狂。  
水背流而源竭兮，木去根而不长。

非重軀以慮難兮，惜傷身之無功。

已矣哉！獨不見夫鸞鳳之高翔兮，乃集大皇之野。

循四極而回周兮，見盛德而後下。

彼聖人之神德兮，遠濁世而自藏。

使麒麟可得羈而係兮，又何以異羣犬羊？

招隱士

桂樹叢生兮山之幽，偃蹇連蜷兮枝相繚。

山氣籠嵒兮石嵯峨，谿谷嶄岩兮水曾波。

猿狖群嘯兮虎豹嘯，攀援桂枝兮聊淹留。

王孫游兮不歸，春草生兮萋萋。

歲暮兮不自聊，蟋蟀鳴兮啾啾。

塊兮軋，山曲<山弗>，心淹留兮恫慌忽。

岡兮沕，憭兮栗，虎豹穴。

叢薄深林兮，人上栗。

嶔岑嵒礚兮礧礧磈礧，樹輪相糾兮林木茷飂。

青莎雜樹兮蘋草蘼靡，白鹿𐄎麇兮或騰或倚。

狀貌崑崙兮峨峨，淒淒兮漉々。

獼猴兮熊羆，慕類兮以悲。

攀援桂枝兮聊淹留。

虎豹斗兮熊羆咆，禽獸駭兮亡其曹。

王孙兮归来，山中兮不可以久留。

## 七谏 初放

---

平生於国兮，长於原野。

言语讷譔兮，又无彊辅。

浅智褊能兮，闻见又寡。

数言便事兮，见怨门下。

王不察其长利兮，卒见弃乎原野。

伏念思过兮，无可改者。

群众成朋兮，上浸以惑。

巧佞在前兮，贤者灭息。

尧、舜圣已没兮，孰为忠直？

高山崔巍兮，水流汤汤。

死日将至兮，兴麋鹿同坑。

块兮鞠，当道宿，举世皆然兮，余将谁告？

斥逐鸿鹄兮，近习鸱枭，斩伐橘柚兮，列树苦桃。

便娟之修竹兮，寄生乎江潭。

上葳蕤而防露兮，下泠泠而来风。

孰知其不合兮？

若竹柏之异心。

往者不可及兮，来者不可待。

悠悠苍天兮，莫我振理。

窃怨君之不寤兮，吾独死而后已。



## 七諫 沉江

---

惟往古之得失兮，覽私微之所傷。

堯、舜聖而慈仁兮，後世稱而弗忘。

齊桓失於專任兮，夷吾忠而名彰。

晉獻惑於嬖姬兮，申生孝而被殃。

偃王行其仁義兮，荆文寤而徐亡。

紂暴虐以失位兮，周得佐乎呂望。

修往古以行恩兮，封比干之丘塋。

賢俊慕而自附兮，日浸淫而合同。

明法令而修理兮，蘭茝幽而有芳。

苦衆人之妒予兮，箕子寤而佯狂。

不顧地以貪名兮，心怫郁而內傷。

聯蕙芷以爲佩兮，過鮑肆而失香。

正臣端其操行兮，反離謗而見攘。

世俗更而變化兮，伯夷餓於首陽。

獨廉潔而不容兮，叔齊久而逾明。

浮雲陳而蔽晦兮，使日月乎無光。

忠臣貞而欲諫兮，諛諛毀而在旁。

秋草荣其将实兮，微霜下而夜降。  
商风肃而害生兮，百草育而不长。  
众并谐以妒贤兮，孤圣特而易伤。  
怀计谋而不见用兮，岩穴处而隐藏。  
成功隳而不卒兮，子胥死而不葬。  
世从俗而变化兮，随风靡而成行。  
信直退而毁败兮，虚伪进而得当。  
追悔过之无及兮，岂尽忠而有功。  
废制度而不用兮，务行私而去公。  
终不变而死节兮，惜年齿之未央。  
将方舟而下流兮，冀幸君之发矇。  
痛忠言之逆耳兮，恨申子之沉江。  
愿悉心之所闻兮，遭值君之不聪。  
不开寤而难道兮，不别横之与纵。  
听奸臣之浮说兮，绝国家之久长。  
灭规矩而不用兮，背绳墨之正方。  
离忧患而乃寤兮，若纵火於秋蓬。  
业失之而不救兮，尚何论乎祸凶。  
彼离畔而朋党兮，独行之士其何望？  
日渐染而不自知兮，秋毫微哉而变容。

众轻积而折轴兮，原咎杂而累重。

赴湘、沅之流澌兮，恐逐波而复东。

怀沙砾而自沉兮，不忍见君之蔽壅。

## 七谏 怨世

---

世沉淖而难论兮，俗嶙峨而参差。

清泠泠而歼灭兮，溷湛湛而日多。

皋鸲既以成群兮，玄鹤弭翼而屏移。

蓬艾亲入御於床第兮，马兰踈蹕而日加。

弃捐药芷与杜衡兮，余奈世之不知芳何？

何周道之平易兮，然芜秽而险巇。

高阳无故而委尘兮，唐虞点灼而毁议。

谁使正其真是兮，虽有八师其不可为。

皇天保其高兮，后土持其久。

服清白以逍遥兮，偏与乎玄英异色。

西施媢々而不得见兮，嫫母勃屑而日侍。

桂蠹不知所淹留兮，蓼虫不知徙乎葵菜。

处溷溷之浊世兮，今安所达乎吾志。

意有所载而远逝兮，固非众人之所识。

骥踌躇於弊輦兮，遇孙阳而得代。

吕望穷困而不聊生兮，遭周文而舒志。

甯戚饭牛而商歌兮，桓公闻而弗置。

路室女之方桑兮，孔子过之以自侍。

吾独乖刺而无当兮，心悼怵而耄思。

思比干之泐々兮，哀子胥之慎事。

悲楚人之和氏兮，献宝玉以为石。

遇厉武之不察兮，羌两足以毕斲。

小人之居势兮，视忠正之何若？

改前圣之法度兮，喜噉嚙而妄作。

亲谗谀而疏贤圣兮，讼谓閭媿为丑恶。

愉近习而蔽远兮，孰知察其黑白？

卒不得效其心容兮，安眇眇而无所归薄。

专精爽以自明兮，晦冥冥而壅蔽。

年既已过太半兮，然埶轲而留滞。

欲高飞而远集兮，恐离罔而灭败。

独冤抑而无极兮，伤精神而寿夭。

皇天既不纯命兮，余生终无所依。

愿自沉於江流兮，绝横流而径逝。

宁为江海之泥涂兮，安能久见此浊世？

## 七谏 怨思

---

贤士穷而隐处兮，廉方正而不容。

子胥谏而靡躯兮，比干忠而剖心。

子推自割而饲君兮，德日忘而怨深。

行明白而日黑兮，荆棘聚而成林。

江离弃於穷巷兮，蒺藜蔓乎东厢。

贤者蔽而不见兮，谗谀进而相朋。

梟鸱并进而俱鸣兮，凤皇飞而高翔。

愿壹往而径逝兮，道壅绝而不通。

## 七谏 自悲

---

居愁懃其谁告兮，独永思而忧悲。

内自省而不惭兮，操愈坚而不衰。

隐三年而无决兮，岁忽忽其若颓。

怜余身不足以卒意兮，冀一见而复归。

哀人事之不幸兮，属天命而委之咸池。

身被疾而不閒兮，心沸热其若汤。

冰炭不可以相并兮，吾固知乎命之不长。

哀独苦死之无乐兮，惜余年之未央。

悲不反余之所居兮，恨离予之故乡。

鸟兽惊而失群兮，犹高飞而哀鸣。

狐死必首丘兮，夫人孰能不反其真情？

故人疏而日忘兮，新人近而俞好。

莫能行於杳冥兮，孰能施於无报？

苦众人之皆然兮，乘回风而远游。

凌恒山其若陋兮，聊愉娱以忘忧。

悲虚言之无实兮，苦众口之铄金。

遇故乡而一顾兮，泣歔歔而霑衿。

厌白玉以为面兮，怀琬琰以为心。  
邪气入而感内兮，施玉色而外淫。  
何青云之流澜兮，微霜降之蒙蒙。  
徐风至而徘徊兮，疾风过之汤汤。  
闻南藩乐而欲往兮，至会稽而且止。  
见韩众而宿之兮，问天道之所在？  
借浮云以送予兮，载雌霓而为旌。  
驾青龙以驰骛兮，班衍衍之冥冥。  
忽容容其安之兮，超慌忽其焉如？  
苦众人之难信兮，愿离群而远举。  
登峦山而远望兮，好桂树之冬荣。  
观天火之炎炆兮，听大壑之波声。  
引八维以自道兮，含沆瀣以长生。  
居不乐以时思兮，食草木之秋实。  
饮菌若之朝露兮，构桂木而为室。  
杂橘柚以为囿兮，列新夷与椒楨。  
鸱鹤孤而夜号兮，哀居者之诚贞。



## 七谏 哀命

---

哀时命之不合兮，伤楚国之多忧。  
内怀情之洁白兮，遭乱世而离尤。  
恶耿介之直行兮，世溷浊而不知。  
何君臣之相失兮，上沅湘而分离。  
测汨罗之湘水兮，知时固而不反。  
伤离散之交乱兮，遂侧身而既远。  
处玄舍之幽门兮，穴岩石而窟伏。  
从水蛟而为徒兮，与神龙乎休息。  
何山石之嶭岩兮，灵魂屈而偃蹇。  
含素水而蒙深兮，日眇眇而既远。  
哀形体之离解兮，神罔两而无舍。  
惟椒兰之不反兮，魂迷惑而不知路。  
愿无过之设行兮，虽灭没之自乐。  
痛楚国之流亡兮，哀灵修之过到。  
固时俗之溷浊兮，志瞽迷而不知路。  
念私门之正匠兮，遥涉江而远去。  
念女嬃之婵媛兮，涕泣流乎於悒。

我决死而不生兮，虽重追吾何及。

戏疾濂之素水兮，望高山之蹇产。

哀高丘之赤岸兮，遂没身而不反。

## 七谏 谬谏

---

怨灵修之浩荡兮，夫何执操之不固？

悲太山之为隍兮，孰江河之可涸？

愿承间而效志兮，恐犯忌而干讳。

卒抚情以寂寞兮，然怊怅而自悲。

玉与石其同匮兮，贯鱼眼与珠玑。

骛骏杂而不分兮，服罢牛而骖骥。

年滔滔而自远兮，寿冉冉而愈衰。

心忡懔而烦冤兮，蹇超摇而无冀。

固时俗之工巧兮，灭规矩而改错。

郤骐驎而不乘兮，策驽骀而取路。

当世岂无骐驎兮，诚无王良之善驭。

见执轡者非其人兮，故驹跳而远去。

不量凿而正枘兮，恐矩矱之不同。

不论世而高举兮，恐操行之不调。

弧弓弛而不张兮，孰云知其所至？

无倾危之患难兮，焉知贤士之所死？

俗推佞而进富兮，节行张而不著。

贤良蔽而不群兮，朋曹比而党誉。  
邪说饰而多曲兮，正法弧而不公。  
直士隐而避匿兮，谗谀登乎明堂。  
弃彭咸之娱乐兮，灭巧倖之绳墨。  
崑路杂於麀蒸兮，机蓬矢以射革。  
驾蹇驴而无策兮，又何路之能极？  
以直针而为钓兮，又何鱼之能得？  
伯牙之绝弦兮，无锺子期而听之。  
和抱璞而泣血兮，安得良工而剖之？  
同音者相和兮，同类者相似。  
飞鸟号其群兮，鹿鸣求其友。  
故叩宫而宫应兮，弹角而角动。  
虎啸而谷风至兮，龙举而景云往。  
音声之相和兮，言物类之相感也。  
夫方圜之异形兮，势不可以相错。  
列子隐身而穷处兮，世莫可以寄託。  
众鸟皆有行列兮，凤独翔翔而无所薄。  
经浊世而不得志兮，愿侧身岩穴而自託。  
欲阖口而无言兮，尝被君之厚德。  
独便悁而怀毒兮，愁郁郁之焉极？

念三年之积思兮，愿壹见而陈辞。

不及君而骋说兮，世孰可为明之？

身寝疾而日愁兮，情沉抑而不扬。

众人莫可与论道兮，悲精神之不通。

乱曰：鸾皇孔凤日以远兮，畜鳧驾鵝。

鸡鹜满堂坛兮，鼃黽游乎华池。

要褻奔亡兮，腾驾橐驼。

铅刀进御兮，遥弃太阿。

拔搴玄芝兮，列树芋荷。

橘柚萎枯兮，苦李旖旎。

甗瓿登於明堂兮，周鼎潜潜乎深渊。

自古而固然兮，吾又何怨乎今之人。

哀时命

哀时命之不及古人兮，夫何予生之不遘时！

往者不可扳援兮，徠者不可与期。

志憾恨而不逞兮，杼中情而属诗。

夜炯炯而不寐兮，怀隐忧而历兹。

心郁郁而无告兮，众孰可与深谋！

歆愁悴而委惰兮，老冉冉而逮之。

居处愁以隐约兮，志沉抑而不扬。

道壅塞而不通兮，江河广而无梁。

愿至昆仑之悬圃兮，采锺山之玉英。

揽瑶木之檀枝兮，望阊风之板桐。

弱水汨其为难兮，路中断而不通。

势不能凌波以径度兮，又无羽翼而高翔。

然隐悯而不达兮，独徙倚而彷徨。

怅惆罔以永思兮，心纤轸而增伤。

倚踌躇以淹留兮，日饥馑而绝粮。

廓抱景而独倚兮，超永思乎故乡。

廓落寂而无友兮，谁可与玩此遗芳？

白日<日宛>々其将入兮，哀余寿之弗将。

车既弊而马罢兮，蹇邐徊而不能行。

身既不容於浊世兮，不知进退之宜当。

冠崔嵬而切云兮，剑淋漓而从横。

衣摄叶以储与兮，左祛挂於榑桑；

右衽拂於不周兮，六合不足以肆行。

上同凿枘於伏戏兮，下合矩矱於虞唐。

愿尊节而式高兮，志犹卑夫禹、汤。

虽知困其不改操兮，终不以邪枉害方。

世并举而好朋兮，壹斗斛而相量。

众比周以肩迫兮，贤者远而隐藏。  
为凤皇作鹑笼兮，虽翕翅其不容。  
灵皇其不寤知兮，焉陈词而效忠。  
俗嫉妒而蔽贤兮，孰知余之从容？  
愿舒志而抽冯兮，庸詎知其吉凶？  
璋珪杂於甑窰兮，陇廉与孟嫫同宫。  
举世以为恒俗兮，固将愁苦而终穷。  
幽独转而不寐兮，惟烦懣而盈匈。  
魂眇眇而驰骋兮，心烦冤之忡忡。  
志欲憾而不憺兮，路幽昧而甚难。  
块独守此曲隅兮，然欲切而永叹。  
愁修夜而宛转兮，气涓{沸鬲}其若波。  
握剡劒而不用兮，操规矩而无所施。  
骋骐驎於中庭兮，焉能极夫远道？  
置援狁於楹槛兮，夫何以责其捷巧？  
驪跛鳖而上山兮，吾固知其不能升。  
释管晏而任臧获兮，何权衡之能称？  
篋簾杂於麤蒸兮，机蓬矢以射革。  
负檐荷以丈尺兮，欲伸要而不可得。  
外迫胁於机臂兮，上牵联於矰雉。

肩倾侧而不容兮，固陋腹而不得息。  
务光自投於深渊兮，不获世之尘垢。  
孰魁摧之可久兮，愿退身而穷处。  
凿山楹而为室兮，下被衣於水渚。  
雾露濛濛其晨降兮，云依斐而承宇。  
虹霓纷其朝霞兮，夕淫淫而淋雨。  
怊茫茫而无归兮，怅远望此旷野。  
下垂钓於谿谷兮，上要求於仙者。  
与赤松而结友兮，比王乔而为耦。  
使皋杨先导兮，白虎为之前后。  
浮云雾而入冥兮，骑白鹿而容与。  
魂眈眈以寄独兮，汨徂往而不归。  
处卓卓而日远兮，志浩荡而伤怀。  
鸾凤翔於苍云兮，故矰缴而不能加。  
蛟龙潜於旋渊兮，身不挂於罔罗。  
知贪饵而近死兮，不如下游乎清波。  
宁幽隐以远祸兮，孰侵辱之可为。  
子胥死而成义兮，屈原沉於汨罗。  
虽体解其不变兮，岂忠信之可化。  
志怍怍而内直兮，履绳墨而不颇。



执权衡而无私兮，称轻重而不差。  
概尘垢之枉攘兮，除秽累而反真。  
形体白而质素兮，中皎洁而淑清。  
时厌饫而不用兮，且隐伏而远身。  
聊窜端而匿迹兮，嗅寂默而无声。  
独便愒而烦毒兮，焉发愤而抒情。  
时暧暧其将罢兮，遂闷叹而无名。  
伯夷死於首阳兮，卒夭隐而不荣。  
太公不遇文王兮，身至死而不得逞。  
怀瑶象而佩琚兮，愿陈列而无正。  
生天墜之若过兮，忽烂漫而无成。  
邪气袭余之形体兮，疾憊怛而萌生。  
愿壹见阳春之白日兮，恐不终乎永年。

## 九怀 匡机

---

极运兮不中，来将屈兮困穷？

深愍兮惨怛，愿一列兮无从。

乘日月兮上征，顾游心兮鄙酆。

弥览兮九隅，彷徨兮兰宫。

芷闾兮药房，奋摇兮众芳。

菌阁兮蕙楼，观道兮从横。

宝金兮委积，美玉兮盈堂。

桂水兮潺湲，扬流兮洋洋。

蓍蔡兮踊跃，孔鹤兮回翔。

抚槛兮远望，念君兮不忘。

怫郁兮莫陈，永怀兮内伤。

## 九怀 通路

---

天门兮墜户，孰由兮贤者？

无正兮溷厕，怀德兮何睹？

假寐兮愍斯，谁可与兮寤语？

痛凤兮远逝，畜鵩兮近处。

鲸鰓兮幽潜，从虾兮游渚。

乘虬兮登阳，载象兮上行。

朝发兮葱岭，夕至兮明光。

北饮兮飞泉，南采兮芝英。

宣游兮列宿，顺极兮彷徨。

红采兮骅衣，翠缥兮为裳。

舒佩兮綵纚，竦余剑兮干将。

腾蛇兮后从，飞駟兮步旁。

微观兮玄圃，览察兮瑶光。

启匱兮探筴，悲命兮相当。

纫蕙兮永辞，将离兮所思。

浮云兮容与，道余兮何之？

远望兮仟眠，闻雷兮阗阗。

阴忧兮感余，惆怅兮自怜。

## 九怀 危俊

---

林不容兮鸣蜩，余何留兮中州？

陶嘉月兮总驾，搴玉英兮自脩。

结荣茝兮透逝，将去烝兮远游。

径岱土兮魏阙，历九曲兮牵牛。

聊假日兮相伴，遗光耀兮周流。

望太一兮淹息，紆余轡兮自休。

晞白日兮皎皎，弥远路兮悠悠。

顾列宇兮缥缈，观幽云兮陈浮。

钜宝迁兮砢礪，雉咸雒兮相求。

泱莽莽兮究志，惧吾心兮憊々。

步余马兮飞柱，览可与兮匹俦。

卒莫有兮纤介，永余思兮怊々。

## 九怀 昭世

---

世溷兮冥昏，违君兮归真。

乘龙兮偃蹇，高回翔兮上臻。

袭英衣兮缙纁，披华裳兮芳芬。

登羊角兮扶舆，浮云漠兮自娱。

握神精兮雍容，与神人兮相胥。

流星坠兮成雨，进瞢盼兮上丘墟。

览旧邦兮滃郁，余安能兮久居。

志怀逝兮心慄栗，纡余轡兮踟蹰。

闻素女兮微歌，听王后兮吹竽。

魂悽怆兮感哀，肠回回兮盘纡。

抚余佩兮缤纷，高太息兮自怜。

使祝融兮先行，令昭明兮开门。

驰六蛟兮上征，竦余驾兮入冥。

历九州兮索合，谁可与兮终生。

忽反顾兮西囿，睹軫丘兮崎倾。

横垂涕兮泫流，悲余后兮失灵。

## 九怀 尊嘉

---

季春兮阳阳，列草兮成行。

余悲兮兰生，委积兮从横。

江离兮遗捐，辛夷兮挤臧。

伊思兮往古，亦多兮遭殃。

伍胥兮浮江，屈子兮沉湘。

运余兮念兹，心内兮怀伤。

望淮兮沛沛，滨流兮则逝。

榜舫兮下流，东注兮礚々。

蛟龙兮导引，文鱼兮上瀨。

抽蒲兮陈坐，援芙蕖兮为盖。

水跃兮余旌，继以兮微蔡。

云旗兮电骛，儵忽兮容裔。

河伯兮开门，迎余兮欢欣。

顾念兮旧都，怀恨兮艰难。

窃哀兮浮萍，汎淫兮无根。

## 九怀 蓄英

---

秋风兮萧萧，舒芳兮振条。

微霜兮眈眈，病殀兮鸣蜩。

玄鸟兮辞归，飞翔兮灵丘。

望谿谷兮滃郁，熊罴兮咆哮。

唐虞兮不存，何故兮久留？

临渊兮汪洋，顾林兮忽荒。

修余兮桂衣，骑霓兮南上。

乘云兮回回，亹亹兮自强。

将息兮兰皋，矢志兮悠悠。

蒹葭兮霉黧，思君兮无聊。

身去兮意存，怆恨兮怀愁。



## 九怀 思忠

---

登九灵兮游神，静女歌兮微晨。

悲皇丘兮积葛，众体错兮交纷。

贞枝抑兮枯槁，枉车登兮庆云。

感余志兮惨栗，心怆怆兮自怜。

驾玄螭兮北征，羈吾路兮葱岭。

连五宿兮建旄，扬氛气兮为旌。

历广漠兮驰骛，览中国兮冥冥。

玄武步兮水母，与吾期兮南荣。

登华盖兮乘阳，聊逍遥兮播光。

抽库娄兮酌醴，援爬瓜兮接粮。

毕休息兮远逝，发玉轸兮西行。

惟时俗兮疾正，弗可久兮此方。

寤辟摽兮永思，心怫郁兮内伤。

## 九怀 陶壅

---

览杳杳兮世惟，余惆怅兮何归。  
伤时俗兮溷乱，将奋翼兮高飞。  
驾八龙兮连蜺，建虹旌兮威夷。  
观中宇兮浩浩，纷翼翼兮上跻。  
浮溺水兮舒光，淹低徊兮咨涕。  
屯余车兮索友，睹皇公兮闵师。  
道莫贵兮归真，羨余术兮可夷。  
吾乃逝兮南娒，道幽路兮九疑。  
越炎火兮万里，过万首兮嶷嶷。  
济江海兮蝉蜕，绝北梁兮永辞。  
浮云郁兮昼昏，霾土忽兮坱々。  
息阳城兮广夏，衰色罔兮中怠。  
意晓阳兮燎寤，乃自轸兮在兹。  
思尧、舜兮袭兴，幸咎繇兮获谋。  
悲九州兮靡君，抚轼叹兮作诗。

## 九怀 株昭

---

悲哉于嗟兮，心内切磋。

款冬而生兮，彫彼叶柯。

瓦砾进宝兮，捐弃随和。

铅刀厉御兮，顿弃太阿。

骥垂两耳兮，中坂蹉跎。

蹇驴服驾兮，无用日多。

修洁处幽兮，贵宠沙崩。

凤皇不翔兮，鸕鷀飞扬。

乘虹骖蜺兮，载云变化。

鹓<sup>明</sup>鸟<sup>开</sup>路兮，后属青蛇。

步骤桂林兮，超骧卷阿。

丘陵翔舞兮，谿谷悲歌。

神章灵篇兮，赴曲相和。

余私娱兹兮，孰哉复加。

还顾世俗兮，坏败罔罗。

卷佩将逝兮，涕流滂沱。

乱曰：皇门开兮照下土，株秽除兮兰芷睹。

四佞放兮后得禹，圣舜摄兮昭尧绪，孰能若兮愿为辅？

## 九叹 逢纷

---

伊伯庸之末胄兮，谅皇直之屈原。

云余肇祖于高阳兮，惟楚怀之婵连。

原生受命于贞节兮，鸿永路有嘉名。

齐名字於天地兮，并光明於列星。

吸精粹而吐氛浊兮，横邪世而不取容。

行叩诚而不阿兮，遂见排而逢讒。

后听虚而黜实兮，不吾理而顺情。

肠愤悁而含怒兮，志迁蹇而左倾。

心懔懔其不我与兮，躬速速其不吾亲。

辞灵修而陨志兮，吟泽畔之江滨。

椒桂罗以颠覆兮，有竭信而归诚。

谗夫蔼蔼而漫著兮，曷其不舒予情？

始结言於庙堂兮，信中涂而叛之。

怀兰蕙与衡芷兮，行中野而散之。

声哀哀而怀高丘兮，心愁愁而思旧邦。

原承閒而自恃兮，径淫暄而道壅。

颜霉黧以沮败兮，精越裂而衰耄。

裳襜褕而含风兮，衣纳纳而掩露。

赴江湘之湍流兮，顺波湊而下降。

徐徘徊於山阿兮，飘风来之汹汹。

驰余车兮玄石，步余马兮洞庭。

平明发兮苍梧，夕投宿兮石城。

芙蓉盖而菱华车兮，紫贝阙而玉堂。

薜荔饰而陆离荐兮，鱼鳞衣而白蜺裳。

登逢龙而下陨兮，违故都之漫漫。

思南郢之旧俗兮，肠一夕而九运。

扬流波之潢潢兮，体溶溶而东回。

心怊怅以永思兮，意晻晻而日颓。

白露纷以涂涂兮，秋风浏以萧萧。

身永流而不还兮，魂长逝而常愁。

叹曰：譬彼流水纷扬磕兮，波逢汹涌瀆滂沛兮。

揄扬滌荡飘流陨往触壑石兮，龙邛將圈繚戾宛转阻相薄兮， 遭纷逢凶  
蹇离尤兮，垂文扬采遗将来兮。

## 九叹 离世

---

灵怀其不吾知兮，灵怀其不吾闻。  
就灵怀之皇祖兮，愬灵怀之鬼神。  
灵怀曾不吾与兮，即听夫人之谀辞。  
余辞上参於天墜兮，旁引之於四时。  
指日月使延照兮，抚招摇以质正。  
立师旷俾端词兮，命咎繇使并听。  
兆出名曰正则兮，卦发字曰灵均。  
余幼既有此鸿节兮，长愈固而弥纯。  
不从俗而谀行兮，直躬指而信志。  
不枉绳以追曲兮，屈情素以从事。  
端余行其如玉兮，述皇舆之踵迹。  
群阿容以晦光兮，皇舆覆以幽辟。  
舆中涂以回畔兮，驷马惊而横奔。  
执组者不能制兮，必折軛而摧辕。  
断镳衔以驰骛兮，暮去次而敢止。  
路荡荡其无人兮，遂不御乎千里。  
身衡陷而下沉兮，不可获而复登。

不顾身之卑贱兮，惜皇輿之不兴。

出国门而端指兮，冀壹寤而锡还。

哀仆夫之坎毒兮，屡离忧而逢患。

九年之中不吾反兮，思彭咸之水游。

惜师延之浮渚兮，赴汨罗之长流。

遵江曲之逶移兮，触石碣而衡游。

波澧澧而扬浇兮，顺长濑之浊流。

凌黄沱而下低兮，思还流而复反。

玄輿驰而并集兮，身容与而日远。

棹舟杭以横濞兮，济湘流而南极。

立江界而长吟兮，愁哀哀而累息。

情慌忽以忘归兮，神浮游以高厉。

心蛩蛩而怀顾兮，魂眷眷而独逝。

叹曰：余思旧邦心依违兮，日暮黄昏羌幽悲兮，去郢东迁余谁慕兮，谗夫党旅其以兹故兮，河水淫淫情所愿兮，顾瞻郢路终不返兮。



## 九叹 怨思

---

惟郁郁之忧毒兮，志坎壈而不违。  
身憔悴而考旦兮，日黄昏而长悲。  
闵空宇之孤子兮，哀枯杨之冤维。  
孤雌吟於高墉兮，鸣鸠栖於桑榆。  
玄猿失於潜林兮，独偏弃而远放。  
征夫劳於周行兮，处妇愤而长望。  
申诚信而罔违兮，情素洁於纽帛。  
光明齐於日月兮，文采耀耀於玉石。  
伤压次而不发兮，思沉抑而不扬。  
芳懿懿而终败兮，名靡散而不彰。  
背玉门以奔骛兮，蹇离尤而干诟。  
若龙逢之沉首兮，王子比干之逢醢。  
念社稷之几危兮，反为雠而见怨。  
思国家之离沮兮，躬获衍而结难。  
若青蝇之伪质兮，晋骊姬之反情。  
恐登阶之逢殆兮，故退伏於末庭。  
孽臣之号咷兮，本朝芜而不治。

犯颜色而触谏兮，反蒙辜而被疑。

菀薜茘与菌若兮，渐藁本於洿渌。

淹芳芷於腐井兮，弃鸡骇於筐簏。

执棠谿以荆蓬兮，秉干将以割肉。

筐泽泻以豹鞞兮，破荆和以继筑。

时溷浊犹未清兮，世殽乱犹未察。

欲容与以俟时兮，惧年岁之既晏。

顾屈节以从流兮，心巩巩而不夷。

宁浮沅而驰骋兮，下江湘以逴回。

叹曰：山中檻檻余伤怀兮，征夫皇皇其孰依兮， 经营原野杳冥冥兮，  
乘骐骋骥舒吾情兮， 归骸旧邦莫谁语兮，长辞远逝乘湘去兮。

## 九叹 远逝

---

志隐隐而郁怫兮，愁独哀而冤结。  
肠纷纭以缭转兮，涕渐渐其若屑。  
情慨慨而长怀兮，信上皇而质正。  
合五岳与八灵兮，讯九魑与六神。  
指列宿以白情兮，诉五帝以置词。  
北斗为我折中兮，太一为余听之。  
云服阴阳之正道兮，御后土之中和。  
佩苍龙之螭虬兮，带隐虹之透蛇。  
曳彗星之皓旰兮，抚朱爵与鵩鸂。  
游清灵之飒戾兮，服云衣之披披。  
杖玉华与朱旗兮，垂明月之玄珠。  
举霓旌之墜翳兮，建黄纁之总旒。  
躬纯粹而罔愆兮，承皇考之妙仪。  
惜往事之不合兮，横汨罗而下瀾。  
乘隆波而南渡兮，逐江湘之顺流。  
赴阳侯之潢洋兮，下石瀨而登洲。  
陆魁堆以蔽视兮，云冥冥而闇前。

山峻高以无垠兮，遂曾閼而迫身。

雪雰雰而薄木兮，云霏霏而隕集。

阜隘狭而幽险兮，石參嵯以翳日。

悲故乡而发忿兮，去余邦之弥久。

背龙门而入河兮，登大坟而望夏首。

横舟航而济湘兮，耳聊啾而懔慌。

波淫淫而周流兮，鸿溶溢而滔荡。

路曼曼其无端兮，周容容而无识。

引日月以指极兮，少须臾而释思。

水波远以冥冥兮，眇不睹其东西。

顺风波以南北兮，雾宵晦以纷纷。

日杳杳以西颓兮，路长远而窘迫。

欲酌醴以娱忧兮，蹇骚骚而不释。

叹曰：飘风蓬龙埃埽々兮，草木摇落时槁悴兮， 遭倾遇祸不可救兮，  
长吟永歔涕究究兮， 舒情陈诗冀以自免兮， 颓流下隕身日远兮。

## 九叹 惜贤

---

览屈氏之离骚兮，心哀哀而怫郁。  
声嗷嗷以寂寥兮，顾仆夫之憔悴。  
拔谄谀而匡邪兮，切洪涇之流俗。  
荡澨淩之奸咎兮，夷蠹蠹之溷浊。  
怀芬香而挾蕙兮，佩江蓠之斐斐。  
握申椒与杜若兮，冠浮云之峨峨。  
登长陵而四望兮，览芷圃之蠹蠹。  
游兰皋与蕙林兮，睨玉石之嵯嵯。  
扬精华以眩耀兮，芳郁渥而纯美。  
结桂树之旖旎兮，纫荃蕙与辛夷。  
芳若兹而不御兮，捐林薄而菀死。  
驱子侨之奔走兮，申徒狄之赴渊。  
若由夷之纯美兮，介子推之隐山。  
晋申生之离殃兮，荆和氏之泣血。  
吴申胥之抉眼兮，王子比干之横废。  
欲卑身而下体兮，心隐恻而不置。  
方圜殊而不合兮，钩绳用而异态。

欲俟时於须臾兮，日阴<日壹>其将暮。

时迟迟其日进兮，年忽忽而日度。

妄周容而入世兮，内距闭而不开。

俟时风之清激兮，愈氛雾其如座。

进雄鸠之耿耿兮，谗介介而蔽之。

默顺风以偃仰兮，尚由由而进之。

心愤恨以冤结兮，情舛错以曼忧。

搴薜荔於山野兮，采撷支於中洲。

望高丘而叹涕兮，悲吸吸而长怀。

孰契契而委栋兮，日暧暧而下颓。

叹曰：江湘油油长流汨兮，挑揄扬汰荡迅疾兮， 忧心展转愁怫郁兮，  
冤结未舒长隐忿兮， 丁时逢殃可奈何兮，劳心愔愔涕滂沱兮。

## 九叹 忧苦

---

悲余心之惓惓兮，哀故邦之逢殃。  
辞九年而不复兮，独茕茕而南行。  
思余俗之流风兮，心纷错而不受。  
遵野莽以呼风兮，步从容於山廋。  
巡陆夷之曲衍兮，幽空虚以寂寞。  
倚石岩以流涕兮，忧憔悴而无乐。  
登巘岵以长企兮，望南郢而窥之。  
山修远其辽辽兮，涂漫漫其无时。  
听玄鹤之晨鸣兮，于高岗之峨峨。  
独愤积而哀娱兮，翔江洲而安歌。  
三鸟飞以自南兮，览其志而欲北。  
愿寄言於三鸟兮，去飘疾而不可得。  
欲迁志而改操兮，心纷结其未离。  
外彷徨而游览兮，内恻隐而含哀。  
聊须臾以时忘兮，心渐渐其烦错。  
愿假簧以舒忧兮，志紆郁其难释。  
叹《离骚》以扬意兮，犹未殫於《九章》。

长嘘吸以於悒兮，涕横集而成行。

伤明珠之赴泥兮，鱼眼玢之坚藏。

同驾羸与乘馭兮，杂斑駁与闾茸。

葛藟{藟系}於桂树兮，鸱鸢集於木兰。

偃促谈於廊庙兮，律魁放乎山间。

恶虞氏之箫韶兮，好遗风之激楚。

潜周鼎於江淮兮，爨土鬻於中宇。

且人心之持旧兮，而不可保长。

遭彼南道兮，征夫宵行。

思念郢路兮，还顾眈々。

涕流交集兮，泣下涟涟。

叹曰：登山长望中心悲兮，菀彼青青泣如颓兮， 留思北顾涕渐渐兮，  
折锐摧矜凝汜滥兮， 念我茕茕魂谁求兮，仆夫慌悴散若流兮。



## 九叹 愍命

---

昔皇考之嘉志兮，喜登能而亮贤。  
情纯洁而罔蕝兮，姿盛质而无愆。  
放佞人与谄谀兮，斥谗夫与便嬖。  
亲忠正之惓诚兮，招贞良与明智。  
心溶溶其不可量兮，情澹澹其若渊。  
回邪辟而不能入兮，诚愿藏而不可迁。  
逐下祆於后堂兮，迎宓妃於伊雒。  
制谗贼於中厖兮，选吕管於榛薄。  
丛林之下无怨士兮，江河之畔无隐夫。  
三苗之徒以放逐兮，伊皋之伦以充庐。  
今反表以为里兮，颠裳以为衣。  
戚宋万於两楹兮，废周邵於遐夷。  
郤骐驎以转运兮，腾驴羸以驰逐。  
蔡女黜而出帷兮，戎妇入而彩绣服。  
庆忌囚於阱室兮，陈不占战而赴围。  
破伯牙之号钟兮，挟人箏而弹纬。  
藏璚石於金匱兮，捐赤瑾於中庭。

韩信蒙於介冑兮，行夫将而攻城。

莞芎弃於泽洲兮，爬蠹蠹於筐簏。

麒麟奔於九皋兮，熊羆群而逸囿。

折芳枝与琼华兮，树枳棘与薪柴。

掘荃蕙与射干兮，耘藜藿与蘘荷。

惜今世其何殊兮，远近思而不同。

或沉沦其无所达兮，或清澈其无所通。

哀余生之不当兮，独蒙毒而逢尤。

虽謇謇以申志兮，君乖差而屏之。

诚惜芳之菲菲兮，反以兹为腐也。

怀椒聊之葢々兮，乃逢纷以罹诟也。

叹曰：嘉皇既歿终不返兮，山中幽险郢路远兮，谗人譏々孰可愬兮，征夫罔极谁可语兮？行吟累欷声喟喟兮，怀忧含戚何佗傺兮。

## 九叹 思古

---

冥冥深林兮树木郁郁。

山参差以崭岩兮，阜杳杳以蔽日。

悲余心之悁悁兮，目眇眇而遗泣。

风骚屑以摇木兮，云吸吸以湫戾。

悲余生之无欢兮，愁倥偬於山陆。

旦徘徊於长阪兮，夕彷徨而独宿。

发披披以鬢々兮，躬劬劳而瘁悴。

魂伥々而南行兮，泣霑襟而濡袂。

心婵媛而无告兮，口噤闭而不言。

违郢都之旧闾兮，回湘、沅而远迁。

念余邦之横陷兮，宗鬼神之无次。

闵先嗣之中绝兮，心惶惑而自悲。

聊浮游於山陬兮，步周流於江畔。

临深水而长啸兮，且倘佯而汎观。

兴离骚之微文兮，冀灵修之壹悟。

还余车於南郢兮，复往轨於初古。

道修远其难迁兮，伤余心之不能已。

背三五之典刑兮，绝洪范之辟纪。

播规矩以背度兮，错权衡而任意。

操绳墨而放弃兮，倾容幸而侍侧。

甘棠枯於丰草兮，藜棘树於中庭。

西施斥於北宫兮，佗傺倚於弥楹。

乌获戚而骖乘兮，燕公操於马圉。

蒯聩登於清府兮，咎繇弃而在野。

盖见兹以永叹兮，欲登阶而狐疑。

乘白水而高骛兮，因徙弛而长词。

叹曰：倘佯垆阪沼水深兮，容与汉渚涕淫淫兮， 锺牙已死谁为声兮？  
纤阿不御焉抒情兮， 曾哀悽歔心离离兮，还顾高丘泣如洒兮。

## 九叹 远游

---

悲余性之不可改兮，屡惩艾而不遑。

服觉皓以殊俗兮，貌揭揭以巍巍。

譬若王侨之乘云兮，载赤霄而凌太清。

欲与天地参寿兮，与日月而比荣。

登昆仑而北首兮，悉灵圉而来谒。

选鬼神於太阴兮，登阊阖於玄阙。

回朕车俾西引兮，褰虹旗於玉门。

驰六龙於三危兮，朝西灵於九滨。

结余轸於西山兮，横飞谷以南征。

绝都广以直指兮，历祝融於朱冥。

枉玉衡於炎火兮，委两轸官于咸唐。

贯瀕濛以东謁兮，维六龙於扶桑。

周流览於四海兮，志升降以高驰。

徵九神於回极兮，建虹采以招指。

驾鸾凤以上游兮，从玄鹤与鹓明。

孔鸟飞而送迎兮，腾群鹤於瑶光。

排帝宫与罗囿兮，升县圃以眩灭。

结琼枝以杂佩兮，立长庚以继日。

凌惊雷以轶骇电兮，缀鬼谷於北辰。

鞭风伯使先驱兮，囚灵玄於虞渊。

溯高风以低徊兮，览周流於朔方。

就颛顼而陈词兮，考玄冥於空桑。

旋车逝於崇山兮，奏虞舜於苍梧。

济杨舟於会稽兮，就申胥於五湖。

见南郢之流风兮，殒余躬於沅湘。

望旧邦之黯黹兮，时溷浊其犹未央。

怀兰茝之芬芳兮，妒被离而折之。

张绛帷以襜褕兮，风邑邑而蔽之。

日噉噉其西舍兮，阳焱焱而复顾。

聊假日以须臾兮，何骚骚而自故。

叹曰：譬彼蛟龙乘云浮兮，汎淫瀺溶纷若雾兮， 潺湲轳轳雷动电发馿  
高举兮， 升虚凌冥沛浊浮清入帝宫兮，摇翹奋羽驰风骋雨游无穷兮。

## 九思 逢尤

---

悲兮愁，哀兮忧，天生我兮当闇时，被诼譖兮虚获尤。

心烦悒 贵兮意无聊，严载驾兮出戏游。

周八极兮历九州，求轩辕兮索重华。

世既卓兮远眇眇，握佩玖兮中路躇。

羨咎繇兮建典谟，懿风后兮受瑞图。

愍余命兮遭六极，委玉质兮於泥涂。

遽倬遑兮驱林泽，步屏营兮行丘阿。

车軌折兮马虺颓，憊悵立兮涕滂沱。

思丁文兮圣明哲，哀平差兮迷谬愚。

吕傅举兮殷周兴，忌嚆专兮郢吴虚。

仰长叹兮气噎结，悵殒绝兮喏复苏。

虎兕争兮於廷中，豺狼斗兮我之隅。

云雾会兮日冥晦，飘风起兮扬尘埃。

走鬯罔兮乍东西，欲窜伏兮其焉如？

念灵闺兮隩重深，愿竭节兮隔无由。

望旧邦兮路逶随，忧心烦兮志勤劬。

魂茕茕兮不遑寐，目眈々兮寤终朝。

## 九思 怨上

---

令尹兮瞢瞢，群司兮譴々。

哀哉兮澼々，上下兮同流。

菽藟兮蔓衍，芳藟兮挫枯。

朱紫兮杂乱，曾莫兮别诸。

倚此兮岩穴，永思兮窈悠。

嗟怀兮眩惑，用志兮不昭。

将丧兮玉斗，遗失兮钮枢。

我心兮煎熬，惟是兮用忧。

进恶兮九旬，复顾兮彭务。

拟斯兮二踪，未知兮所投。

谣吟兮中野，上察兮璇玑。

大火兮西睨，摄提兮运低。

雷霆兮硠磕，雹霰兮霏霏。

奔电兮光晃，凉风兮怆悽。

鸟兽兮惊骇，相从兮宿栖。

鸳鸯兮嗷々，狐狸兮々。

哀吾兮介特，独处兮罔依。



蝼蛄兮鸣东，蝻兮号西。

戴缘兮我裳，蠋入兮我怀。

虫豸兮夹余，惆怅兮自悲。

伫立兮怵怛，心结縉兮折摧。

## 九思 疾世

---

周徘徊兮汉渚，求水神兮灵女。

嗟此国兮无良，媒女拙兮譴謏。

鵙雀列兮譁讟，鸛鹄鸣兮聒余。

抱昭华兮宝璋，欲衔鬻兮莫取。

言旋迈兮北徂，叫我友兮配耦。

日阴暝兮未光，阒眇窈兮靡睹。

纷载驱兮高驰，将谘询兮皇羲。

遵河皋兮周流，路变易兮时乖。

瀛沧海兮东游，沐盥浴兮天池。

访太昊兮道要，云靡贵兮仁义。

志欣乐兮反征，就周文兮邠岐。

秉玉英兮结誓，日欲暮兮心悲。

惟天禄兮不再，背我信兮自违。

逾陇堆兮渡漠，过桂车兮合黎。

赴昆山兮暵馥，从邛遨兮栖迟。

吮玉液兮止渴，齧芝华兮疗饥。

居嶢廓兮眇畴，远梁昌兮几迷。

望江汉兮溟涸，心紧綦兮伤怀。

时咄々兮且旦，尘莫莫兮未晞。

忧不暇兮寢食，吒增叹兮如雷。

## 九思 悯上

---

哀世兮碌々，譏々兮嗌喔。

众多兮阿媚，骯靡兮成俗。

贪枉兮党比，贞良兮莸独。

鹄窜兮枳棘，鹈集兮帷幄。

蕝藟兮青葱，槁本兮萎落。

睹斯兮伪惑，心为兮隔错。

逡巡兮圃薮，率彼兮畛陌。

川谷兮渊渊，山阜兮峿々。

丛林兮崑崙，株榛兮岳岳。

霜雪兮漼漼，冰冻兮洛泽。

东西兮南北，罔所兮归薄。

庇荫兮枯树，匍匐兮岩石。

蜷跼兮寒局数，独处兮志不申。

年齿尽兮命迫促，魁垒挤摧兮常困辱。

含忧强老兮愁不乐。

须发苴悴兮顚鬓白，思灵泽兮一膏沐。

怀兰英兮把琼若，待天明兮立踟躅。

云蒙蒙兮电儵烁，孤雌惊兮鸣𤔔𤔔。

思怫郁兮肝切剥，忿悁悁兮孰诉告。

## 九思 遭厄

---

悼屈子兮遭厄，沉王躬兮湘汨。  
何楚国兮难化，迄乎今兮不易。  
士莫志兮羔裘，竞佞谀兮谗阍。  
指正义兮为曲，訛玉璧兮为石。  
鴟雕游兮华屋，鵩鶖栖兮柴簇。  
起奋迅兮奔走，违群小兮謷訥。  
载青云兮上昇，適昭明兮所处。  
蹶天衢兮长驱，踵九阳兮戏荡。  
越云汉兮南济，秣余马兮河鼓。  
云霓纷兮<sup><日奄></sup>翳，参辰回兮颠倒。  
逢流星兮问路，顾我指兮从左。  
逡娵觜兮直驰，御者迷兮失轨。  
遂踢达兮邪造，与日月兮殊道。  
志阒绝兮安如，哀所求兮不耦。  
攀天阶兮下视，见鄢郢兮旧宇。  
意逍遥兮欲归，众秽盛兮沓沓。  
思哽餗兮诘咄，涕流澜兮如雨。

## 九思 悼乱

---

嗟嗟兮悲夫，殽乱兮纷拏。

茅丝兮同综，冠屨兮共絢。

督万兮侍宴，周邵兮负刍。

白龙兮见射，灵龟兮执拘。

仲尼兮困厄，邹衍兮幽囚。

伊余兮念兹，奔遁兮隐居。

将升兮高山，上有兮猴猿。

欲入兮深谷，下有兮虺蛇。

左见兮鸣鵙，右睹兮呼梟。

惶悸兮失气，踊跃兮距跳。

便旋兮中原，仰天兮增叹。

菅蒯兮野莽，萑苇兮仟眠。

鹿蹊兮继踵，獬貉兮蟬々。

鸛鷖兮轩轩，鶡鴒兮甄甄。

哀我兮寡独，靡有兮齐伦。

意欲兮沉吟，迫日兮黄昏。

玄鹤兮高飞，曾逝兮青冥。

鸛鷖兮喈喈，山鵲兮嚶嚶。

鴻鵠兮振翅，歸雁兮于征。

吾志兮覺悟，懷我兮聖京。

垂屣兮將起，跼俟兮碩明。



## 九思 伤时

---

惟昊天兮昭灵，阳气发兮清明。

风习习兮和暖，百草萌兮华荣。

堇荼茂兮扶疏，蘅芷彫兮莹嫫。

愍贞良兮遇害，将夭折兮碎糜。

时混混兮浇𧸁，哀当世兮莫知。

览往昔兮俊彦，亦诎辱兮系纍。

管束缚兮桎梏，百贸易兮传卖。

遭桓缪兮识举，才德用兮列施。

且从容兮自慰，玩琴书兮游戏。

迫中国兮窄陋，吾欲之兮九夷。

超五岭兮嵯峨，观浮石兮崔嵬。

陟丹山兮炎野，屯余车兮黄支。

就祝融兮稽疑，嘉己行兮无为。

乃回謁兮北逝，遇神孀兮宴娭。

欲静居兮自娱，心愁感兮不能。

放余辔兮策驷，忽飙腾兮浮云。

蹶飞杭兮越海，从安期兮蓬莱。

缘天梯兮北上，登太一兮玉台。

使素女兮鼓簧，乘弋觺兮讴谣。

声噉詵兮清和，音晏衍兮要淫。

咸欣欣兮酣乐，余眷眷兮独悲。

顾章华兮太息，志恋恋兮依依。

## 九思 哀岁

---

旻天兮清凉，玄气兮高朗。

北风兮潦冽，草木兮苍唐。

蚍蜉兮噉噉，螂蛆兮穰穰。

岁忽忽兮惟暮，余感时兮悽怆。

伤俗兮泥浊，矇蔽兮不章。

宝彼兮沙砾，捐此兮夜光。

椒瑛兮涅汙，藁耳兮充房。

摄衣兮缓带，操我兮墨阳。

昇车兮命仆，将驰兮四荒。

下堂兮见蚤，出门兮触蜂。

巷有兮蚰蜒，邑多兮螳螂。

睹斯兮嫉贼，心为兮切伤。

俯念兮子胥，仰怜兮比干。

投剑兮脱冕，龙屈兮蜿蟺。

潜藏兮山泽，匍匐兮丛攒。

窥见兮溪涧，流水兮沄沄。

鼃鼃兮欣欣，鱣鮪兮延延。

群行兮上下，骈罗兮列陈。

自恨兮无友，特处兮茕茕。

冬夜兮陶陶，雨雪兮冥冥。

神光兮颢颢，鬼火兮荧荧。

修德兮困控，愁不聊兮遑生。

忧纡兮郁郁，恶所兮写情。

## 九思 守志

---

陟玉峦兮逍遥，览高冈兮峣峣。

桂树列兮纷敷，吐紫华兮布条。

实孔鸾兮所居，今其集兮惟鸛。

乌鹊惊兮哑哑，余顾瞻兮怊怊。

彼日月兮闇昧，障覆天兮褻氛。

伊我后兮不聪，焉陈诚兮效忠。

摠羽翮兮超俗，游陶遨兮养神。

乘六蛟兮蜿蜒，遂驰骋兮升云。

扬彗光兮为旗，秉电策兮为鞭。

朝晨发兮鄢郢，食时至兮增泉。

绕曲阿兮北次，造我车兮南端。

谒玄黄兮纳贄，崇忠贞兮弥坚。

历九宫兮遍观，睹秘藏兮宝珍。

就传说兮骑龙，与织女兮合婚。

举天罍兮掩邪，彀天弧兮射奸。

随真人兮翱翔，食元气兮长存。

望太微兮穆穆，睨三阶兮炳分。

相辅政兮成化，建烈业兮垂勋。

目瞽瞍兮西没，道遐迥兮阻叹。

志蓄积兮未通，怅敞罔兮自怜。

乱曰：天庭明兮云霓藏，三光朗兮镜万方。

斥蜥蜴兮进龟龙，策谋从兮翼机衡。

配稷契兮恢唐功，嗟英俊兮未为双。